

李中麓閒居集

李中麓閒居集之三

七言律詩

早春即事

枿半青黃葉欲舒雪殘又是雨晴初
帶耕且讀陶潛傳種樹頻翻郭橐書
每撫雄心還自笑羞將鶴髮對人梳
真知生計惟春日罷吏為農十載餘

白雲湖夜泛

夾岸人烟水四圍蘇堤景物亦依稀
中流擊楫鼉鼉出樹底鳴榔鳥雀飛
漁火錯疑明月上風

帆相伴白雲歸裏湖歷盡歡無盡况可乘虛望
翠微

送胡永還楚

佐政山城已四春乞歸懶去走風塵齊庭此後
誰良牧楚國從來有逐臣彭蠡鴈多堪設弋武
昌魚美好垂綸農經竹譜吾家有把贈同心林
下人

谷少岱贈詩次韻奉答

讀史須知廢與興解疑何日會良朋酒狂我亦

稽中散詩思君為王右丞講道朝來揮玉麈
迺禪夜對散花燈幾迴欲和陽春曲閣筆停
盃媿不能

送齊東黃尹陸濟寧州守

莫嗟枳棘久棲鸞良牧由來古所難五馬今為
唐郡守雙鳬舊是漢郎官舟車使者年來急水
陸居民日愈殘君去固多安輯術政成應不數
劉寬

足被刺傷作

自是公門踪跡稀
芒屨不離釣魚磯
刺瘡有意成吾懶
簡禮無心任世譏
傷足色憂從古有
登山涉水願今違
棄閒可了詩文債
潦草篇章信筆揮

與客夜話

足疾經秋塵事稀
夜來有客欸荆扉
城頭擊折樓鴉起
松下焚香待鶴歸
家室要移三島去
夢魂不逐五雲飛
笑談引領天邊望
炯炯明星是少微

戊申得子志喜

中年得子非為晚
試聽啼音喜不禁
入夏結榴
今有驗先是花乘春插柳本無心
薄田山後過
千畝古剡堂中直
百金已幸吾生今有託
正富
強仕又投簪

聞夏桂洲凶報

驅犢躬耕今幾秋
久忘帝里舊豪遊
少年知己
如星散往事傷心付水流
袖內不藏新諫草
燈
前時補敝貂裘上方有劍何須請相國
驚聞瀝

血頭

贈少岱

宰邑三年政已成才高自古謗偏生聞鷄起舞
常無寐倚馬能詩舊有名愧我殊非東道主憐
君今是左丘明因其喪明兼素業春秋故云臨爐早晚成丹
藥欲獻彤廷託上卿

正月十日與王雲峯遶西墅陳泰峯高栢
亭南遊歸途遇雪入夜轉盛次日成詩用
紀歲事云

隨風輕霰迷山谷四子相携正遠遊
梁苑才高能作賦剡溪興盡却迴舟
旋空桺絮春疑早著樹瓊花夜更稠
臘雪未消今又雪定應一麦比三秋

新春觸事偶述

往歲迎陽鬧管絃近來萬井少飛烟
中人室內無僭石斗粟街頭過百錢
堅壁黃昏穿窟穴綠林白晝挺戈鋌
東方冠盜紛如蟻畿甸流亡况

兩年

儋都
中切

中秋月

不知今夕誠何夕
祇見蟾光倍有光
皎皎玉樓同白晝
泠泠金笛咽清商
堪憐桂子零秋露
無奈萱花被早霜
搔癢脫巾頻顧影
照來分外鬢

毛蒼

母亡後
又喪子

送王杏里上京改任

歷官籍籍著賢聲
藩臬遲迴半此生
不獨文章高世望
况多行義重鄉評
行將宣室虛前席
長列台垣作上卿
毀譽升沉何足較
此心自恃比

水清

柬謝曾石塘保薦

休嗟彈鋏食無魚
投効歸來卧舊廬
羅漢松聲宵翠律
觀音柏影午扶疎
堂中時下高人榻
門外稀聞長者車
自分灌園同老圃
臺賢何事走旌書

贈袁西野有序

鄉賓袁西野能詞善詩謎
棊手及齊雲之社
各臻其妙尊甫孕蟾翁
以秋官郎謫州佐後

遷慶陽二守兄西溪判汝寧弟湖峯太守河
間且門橫漁舫家藏走犬桺陰掩日溪水環
居布衣而有薦紳之貴村落不殊蓬壺之區
詩以美之蓋門第之高技藝之美住居之幽
而勝一詩兼備之云

父曾別駕兄三府六弟還為五馬侯君善詩禪
兼蹴踘家多獵犬更漁舟猷碁賭酒乘春興秉
燭摘詞恣夜遊宴罷學宮歸別墅門前綠桺接
芳洲

丁未除夕

四十七年明日是百年將半此閒身不因閏月

今新正

是年閏九月

况在窮冬已立春

是月十七日立春

流

影有如駒過隙哀聲不啻鴈離群

群字出韻因悲惋不及致

詳亦不復改正以見吾情慘云

向時守歲燈前侶枚淚迴看少

二人

贈張雲霞鍊師二首

相隨道友訪蓬壺煉藥長臨太乙爐柱史將歸
閑令識麻姑曾降蔡經無遠遊衣帶三江色靜

養玆藏五岳圖家在梁園何足戀求仙自古棄
妻孥

遁居道觀侍元君海鶴丰姿迥出群採藥朝遊
三十載燃藜夜讀五千文眉間道氣人爭覩肘
後仙方世未聞本為遜名名自著餘霞散作一
天雲

江南倭夷作亂殺傷山東民兵二首

卜居人謂江南好豈意年來只備倭有類孤奔
因夜警幾經龍戰似朝歌傷心夾岸人烟少極

自中流戰艦多誰為挽回天漢水乘風倒瀉洗
兵戈

家本東藩六郡良一朝抽選事戎行可憐債帥
原無統況乃佳兵最不祥北備邊方猶自可南
來水戰本非長人言捉象還須象療瘡瘡擯擯出
瘡鄉

象風而逸象奴急縱他
象捉之舍象更無術也

辛亥生子

花生鬚髮年將老春仲重生第二郎乾殺蠹魚
書久廢使傷健犢地多荒他年耕讀知能未此

日歌謠喜欲狂課子明農林下事從今不復夢
銅章

贈虞一峯道者

塵世紛紛醉夢間百年今見一人閒王侯不事
成高尚弟子相隨問大還猿洞久居無主客鳳
陽那記是鄉關鶻冠鶴氅身無累不煉金丹也
駐顏

見殘菊作有序

菊備各色而黃獨著名以黃屬金而合秋令

香又倍於他菊。秋旣搗打，必資人力。雖勤者，不能養千頭。吾園當其盛時，總有百五十種。炫日蒸雲，雖南菊亦多有之。每置酒延賓，無不歡賞。竟日自母下世，而子上殤，菊既廢，而會亦寢。至甲寅菊月，砌邊尚餘數本，然殘落不堪注目。愴然感懷，寫哀於詩。

佳菊多從南國來，園丁着意善栽培。滿籬無數黃金朶，勸客頻催白玉杯。醉插烏紗華髮亂，採歸錦袖笑顏開。殘英夾砌今重見，感舊題詩調。

轉哀

重陽

父亡正值重陽日今日重陽母服終髮少愁多
難更白容衰火病亦添紅雲長旅鴈聲雖已木
落蒼山望不窮奠酒鵲盃虛對客年年齋素野
僧同

亡妻忌辰

傷心復是妻亡日倏忽經今已六霜若得生前
存子女猶于身後慰衷腸驅魂難借金篦力照

面仍餘寶鏡香感舊憐新渾不語愁多但覺鬢
蒼蒼

寄繼內

娶妻娶德非專色吾娶齊東兩得之勤儉有如
貧士女家風克稱太常妻李詩雖為李太白婦不異太常妻非恩
無以懷諸婢不妬方能處衆姬前子雖傷今有
望母儀胎教汝須知

代內答寄

何須對客日彈碁禿却毛雖只詠詩廣置田園

難管理多藏書籍費心思五旬無子君休慮衆
妾分恩我不私庭樹均蒙培植力紛紛映日長
新枝

憶張二

花開正值東風惡嫩蕊紅英逐水漂異症國醫
難料理相思岐路轉迢遙嬌容不照青銅鏡逸
韻無聞碧玉簫觸物傷情雙落淚餘香猶染舊
鮫綃

詠泥四

笑靨烘霞醉碧桃恍疑仙子謫仙曹可當詩客
題佳句愁殺良工運彩毫玉體難勝白玉珮金
蓮偏稱鬱金袍百年誰識春如海不慮繁霜洒
鬢毛

贈張三

八字眉彎一捻腰燈前偷覷不勝嬌迴頭笑語
金釵溜舞態輕盈玉佩搖柔嫩雨花含半蕊妖
娆風柳拂新條千鍾一飲非前日一刻千金是
此宵

送李脉泉憲長之任貴州

五溪自古多猛獍作吏何須密網羅廉訪雖云
持漢法夷氓惟願布陽和身經蟻貝三家市耳
聽侏儻四野歌暫屈遠方終必達清風自足激
頽波

鐏白

戢手左思何必鐏左思白髮賦願戰長微剪我
亦堪哀唐韋長微剪白髮蕭蕭白髮三千丈耿
耿丹心一寸灰有限年光驚過半無端煩惱苦

相催不知逝水歸何處祇見霜華鏡裏來

秋日觀山漲

年前望日驚秋漲今日今年感再遭霜重巖巖
山骨瘦雨多滾滾浪花高風吹雲墮崖崩圻電
引雷轟水怒號對岸馬牛渾莫辨誰云河廣不
容刀

携客登江上樓

卧病滄江歲幾周忘機日日狎輕鷗築樓近傍
水深處倚檻遙看天盡頭老徹風簾宵有月涼

生雲榻早知秋憑高須竭千盃酒與客同消萬
里愁

寄魏及齋方伯

喜聞病後身能健相會年前意最真未得酒盃
談笑久祇于書札往來頻暫居右轄清戎政不
日中台秉國鈞霖雨上同商傳說禮賢下視漢
平津

初冬出遊

冬前望後遊南浦架木危橋試一登蕭蕭遙聞

鰕兔網紛紛近見布魚罾蒼茫荻岸如凝雪灩
澦蓮塘未結冰風日不寒堪遠訪欲將心事訴
詩僧

秋日過北村

百事無成感四休心閒到處即瀟洲禾蘇水溢
皆因雨鴈唳蟲鳴各報秋風蕩荷香侵坐席月
穿柳影拂牆頭重來料必蕭疎甚始識今遊是
勝遊

題高秋悵離卷

中麓子以疾辭官抵家又以疾謝客客有慕
名相訪者或不遠千里中麓子率常儉與見
也鄧之呂子名時臣號東野者携其詩冊并
四賢傳詞託吾門閭投入馬吾覽其詩即知
其詞覽其詞即知其人言之秀麗必其人之
清雅者也出見之果如所逆料乃延之坐而
語之曰子問學積久關竅將開有雖休勿休
之勢欲已不已之機吾今隨其勢而利導之
迎其機而速決之譬諸江河將一瀉千里射

者殆百發百中矣。關竅一開，十餘年間學之功，不爲浪費。詩須唐調，詞必元聲，然後爲至。如水之源，射之的，修養家之玄關妙竅也。遂館之寺中，置之門下，遨遊座上，朝夕討論，非詩則詞，詩詞非唐則元已。而較其詩，詩則變矣，較其詞，詞又變矣。不惟詩詞善變，貌亦變而之充實矣。雖非唐調，元聲駸駸乎有唐之中格元之餘響矣。謁吾之餘詩，又請於張栢巖、陳泰峯。詞又請於袁西野、高筆峯。其虛心

受善北方學者未之或先也宜其詩詞速變
如此然獨功吾則吾豈敢因倭夷作耗大江
南北全浙東西紛然騷動歸途既阻旅寓日
多自春而夏而秋在吾章凡歷三時近聞軍
兵衆盛海徼澄清呂子亟圖歸計感汾上之
辭動江東之興際海燕之辭主效越鳥之巢
南時則百卉俱腓涼風如律山蒼望外雲淡
天中餞別於西郊悵然傷懷因題其卷曰高
秋張離詳具於序情見乎詩又贈之以古今

書問呂子自謂充然有得吾猶歛然如有所
負人惜與叔之去吾又喜吾道之南也覽者
將以是卷畢知前因吾將籍是卷以期後會
云

有客東來從我遊裁詩度曲已經秋南歸必出
三吳路冠道全消兩浙愁是後空懸徐穉榻何
時重上李膺舟寄書秘冊人爭借莫道相傳自
鄴侯

送蕭通府致政

春來頻夢迢田廬仕路方事即駐車浴鳥喜隨
江上棹嘉魚莫損枕邊書不煩吏卒紛趨謁自
有兒童候起居
范蠡蠡書圖歸興動陳恭風節世

無如

宋陳恭判毫有獻范蠡圖者即日致仕去

讀農桑纂輯二要有感

窮經兀兀不知年白首為儒硯已穿校字張燈
熬病目東書作枕著華顛呼童閉戶辭賓客無
吏催租對聖賢但著農桑三兩卷勝為小說百
千篇

送魏及齋陞雲南左方伯

一門清要世難儔
藩伯今為古列侯
政善何須分遠邇
官閒應不廢吟謳
碧鷄金馬窮玄覽
白鶴青龍恣壯遊
暫擢炎方旋內拜
無勞高築望京樓

京樓

成詩後始知非雲南邸報訛傳耳

仲夏苦熱三首末首用杜子七月六日韻

自謂忘情亦動情
忽驚節序及朱明
鳴蜩趁樹聲偏遠
乳燕離巢翼已成
煩暑有同春酒醉
微涼不向曉衣生
賜冰寵幸原無分
濡筆聊賡苦

熱行

大火司天屬祝融紅雲夾日焰燒空過時不見

濯枝雨

風土記五月有大雨謂之濯枝雨

抵暮思披解愠風涼

藥不如米有效炎氛難遣扇無功試將桃李充
饑渴顚顚墻頭熟滴紅

少年曾蓄千年志百事今無一事能避暑茂林

傾綠蟻

梁帝纂要夏木稠茂林古人避暑飲便涼白壁

點青蠅

蠅性喜涼每盛暑必群集粉壁因被點汚泠泠石井堪消渴

滾滾塵踪不可仍一自熱場遭斥遣此心今已

冷如水

喜暑雨初霽

未雨陰雲忽四垂
雨餘雲日迫添姿
庭階滑甚行還却
枕簟涼生卧自宜
樹上一鳩仍喚急
梁間雙燕得歸遲
衆林禱罷甘霖注
正是商巖得用時

直書所事

此身久不列朝行
坐卧惟安一草堂
手剔蒲梳多白髮
口占一曲半清商
著棊太勝難終局
服

藥無功再檢方省事間人還有事相尋漁父詠
滄浪

客有訛傳將起用予者中夜熱甚不能安
寢獨步望月作爲此詩

每逢貴客起談鋒自是輕狂世不容無復蒲輪
徵北上惟工辭賦待東封暑中高枕安眠少病
後巡簷舉步墮月掛松梢臨夜半倉皇疑是吐
珠龍

閒述

相隨漁父久垂綸手疏辭官十五春身似長鄉
常抱病產過仲子不為貧向時牛馬隨呼應近
日鳬鷗情益親倭寇已兵齊寇執不妨長作太
平民

蘇人郭第號五遊向予索五遊詩

家在兩湖非不美遍登五嶽更探奇壯遊萬里
如司馬能賦三都逼左思路費囊中携善藥贄
儀筆底掃新詩羨君久客長無乏是處逢人善
解頤

喜雪三首

氣和千里晚烟橫瑞雪飄飄蝶翅輕鶴氅遮身
不受濕鹿皮戀首亦多情松風共作牕前韻梅
月相將分外清地脉不乾春更好豫修耒耜候
深耕

雲盛誰知雪倍增朝雲未散暮雲興眼迷玉宇
三千界身在瓊樓十二層擁篲急除妨出入把
盃欣賞醉膏騰從來宜麥須三白朝野簽載云
要宜麥見三白東國連年歲不登

往時冬雪每愆期今歲連陰雪不遲
盡閣光搖宜夜宴烟樓濕透強朝炊
冷侵詩客吟肩聳影襯嬌娥舞袖垂
喜有同心長聚首更無孤客滯天涯

畫雪三首

錯認荻蘆無此白早梅只是綻南枝
漫天爭覩楊花亂落地能將物象移
隱隱樓頭昇旭日冷冷簷下滴冰漸
普天慶幸逢奇瑞止慰農人是
有私

雪勢翩翩那得似長江浩浩滾波瀾蕭蕭木葉
霜前落片片梨花雨後殘寂寞祇宜沽酒賞徘徊
幾度捲簾看東皇早把東風借多病年來不耐
寒

寒烟匿日澹無光弱雪那禁風力強窓上似聞
蟲撲簌庭前爭覩蝶飛揚豪門酣飲銷金帳茅
屋皆成白玉堂東去難尋三島路北瞻何處五
雲鄉

夜雪三首

至後逢昏便不晴隨風歷亂雪花輕映梅疑是
長春苑帶月真如不夜城明日頓高芻米價深
更猶聽管絃聲多因節近兼嘉瑞盃酒酣歌民
樂生

漠漠寒雲失翠微燈花綫落雪花飛分敷草上
嚴霜色點染梅稍淡月輝簫擁霏霏驚玉屑琴
彈白雪拂金徽詰朝獵戶來相約狡兔妖狐早
見機

窟蟄水龍無處吟危巢凍樹惱棲禽倒垂冰筋

玲瓏色斜洒蒼筠瑣碎青冷霧偏來添厲氣暖
風何日散層陰普家夜幸緣何事定策平南遂
夙心

大雪晝寒

雪盛如翻百寶車雪餘冷氣浩無涯衣添狐白
身仍慄鈔乏鴉青酒用賒忽憶衝風曾出塞幸
然趁暖早還家堂前墻下風猶可尚勒紅梅未
吐花

大雪夜寒二首

訪戴尋梅興已孤千蹊萬徑撚窮途珠宮隱約
雲中現銀闕蒼茫眼底殊綺戶無風簾不捲瑤
臺有月筆難圖一冬今夜寒為最溫室堅冰滿
玉壺

兩次凌寒塞上行歸來多病卧南榮憑欄玩雪
心猶懶伏枕聞風夢亦驚報道田中十字裂從
交至後一陽生暗傷歲月催人老不但冰霜冷
宦情

阻雪憶友

候神奉職海神朝靈雪三冬五度飄義輦驅龍
騰碧海仙人騎鶴下青霄疎梅破白爭先發古
栢凌寒獨後凋良友山中空坐憶雲深路滑不
能招

雪中遊廣嚴寺

漫遊蕭寺雪交加好似瞿曇雨寶花雲葉看來
真貝葉法華誦罷玩瓊華紛紛祇樹皆銀蘂滾
滾恒河湧玉沙恠底雪深迷去馬化城岐路本
來差

踏雪

霰飛長在雪飛初
皓色須臾塗我廬
吠犬南華蝶入夢
牧羊塞北鴈傳書
閑披宿草搜潛兔
遍探寒梅策蹇驢
遊獵且乘野客興
賦成何必待相如

雪中送別

披策漁父卧銀沙
淡月踈梅照影斜
好似戰龍飛敗甲
堪憐良驥伏塩車
神光堅立達摩側
人僧雪中堅立不動
陶穀何如太尉家
送客江亭難

遯別臨風投贈以瑤華

雪晴

夜雪朝晴景色異簷垂冰溜樹花開風吹樹杪
疑花落日照簷前似雨來曝背暫移堂上榻暢
懷頻覆手中杯瓊樓寒煖憑誰問萬里

君門望屢回

清明日山行遇雪二首

往年花柳弄春姿風霰凝寒今較遲
兔走難尋團草穴鳥驚為折帶
巢枝雪飛不似清明日雲

重堪稱綠暗時世遠知音當更少
有誰繼和郢中詞

舊雪山巖久已殘禁烟之日復迷漫
掠雲裊霧偏增濕夾雨因風尚作寒
牧豎向人爭斗笠田翁邀客具盤餐
解衣籍坐茅茨下過者應將圖畫看

清明雪中墓祭迴有序

墓祭甫畢忽憶城有雅會日薄暮而雪
轉加自限不能赴矣即有兩青衣手持

邀簡踞而口稱衆客惟散坐必待予行
酒予不得已馬遜疾足僕用少年衝風
冒雪而旋途中作為此詩至則遍呈座
客

一天飛絮滾風前衝冒歸來赴綺筵綠蟻想斟
銀鑿落白駒馳突鐵連錢節逢難得花如雪日
暮遙看柳帶烟寒食不逢明媚景林居十度閱
芳年

送思州王梧岡太守

朝覲畢迴郡

行車重載書多新來悟得先天妙夜月無心印
碧波

勘破繁華如一夢俗情官罷每難過安居已是
三生幸憤世何勞五噫歌交友必從擇友始知
人全在閱人多年年拉伴同登眺家近蒼崖與
綠波

讌樂只嫌良夜短光陰疾似白駒過多情注視
纖腰舞老作宜煩皓齒歌倘得由今躋遠壽不
愁來日苦無多躬逢家國隆平日東海傳聞久

不波

一秋廢學緣多病百歲流光撚指過靖節漉巾
真好飲馮驩彈鋏最能歌有謀兼勇為難得無
行能文不足多良友文才天下少愧吾同罷押
鷗波

虛名薄利爭無已好似雲烟眼外過縱犬閒觀
田父獵騎牛遙聽牧童歌菜羹碗內香而滑菊
酒床頭旨且多林下滿前皆樂事仕途何若久
奔波

春日遣興

引病東歸卧舊庵
菴前景物似江南
窺簾晝永來山鳥
成繭春深半野蚕
風外沸泉聲不斷
雲邊綠樹影相參
山人非是處名利
曾來性不貪

寄題李蒲汀尚書藏書樓

兩世尚書百世芳
書樓突兀應文昌
古經當日曾分借
新刻別來屢寄將
皇甫一車蒙國賜
景文百軸作家藏
忽驚螢火簷前過
疑是燃藜夜

有光

用前韻寄題晁春陵藏書屋

世史子長名姓芳

春陵父

翰林雄文巨筆述明昌

牙籤悉付僕奴掌細帙頻勞使者將蝌蚪周書

掘塚得龍蛇禹刻出山藏讀書莫鑿匡衡壁自

有窓前明月光

歸田後謝招隱數君子

相知苦勸及時還書奏明光願乞閒交友共超
形跡外罷官免在是非間氣虛病愈聲猶壯耳

順年臨步不艱收獵樵蘇勤稼穡餘生三事不
離山

孟冬河上遇羅海嶽

不攜書劍客天涯因病休官理釣槎風急走沙
埋凍樹雲殘露日照寒花偶于河上逢詩客便
向村中覓酒家魚賤不能拚一醉半留簑笠半
相賒

庄所書懷

薄劣自甘終棄置病衰不復夢朝參閒居久把

魚磯占仕路曾將虎穴探
碁士遇吾長敗北將軍對客話
征南兵戈碁局皆機智二事從今誓
不談

著碁謂
之手談

張順齋昂文冬夜月下寫詩見訪即席奉

荅

擊戶投詩墨未乾
鶴驚犬吠夜將闌
僕從隣舍忙賒酒
客到門庭始具冠
生炭共煨烟氣暖
破牕透入月光寒
飲酣耳熱歌還嘯
雄劍床頭幾度看

寄御醫意菴王瑛罷官南歸

意菴良劑衆無同近效兼能奏遠功病從內作

吾何有

醫書言先富貴後貧賤病從內作
生予之罷也意菴嘗惠解鬱湯醫已旁

通爾不窮後會那能前定日廢居莫效左書空
生平輕利行囊少數卷方書一藥籠

歲暮書懷

簷下冰垂雪已晴雲邊斗轉歲將更靜居細玩
先天易勇退非干後日名酒可留賓當盡醉賦
能結主不須成莫愁寒谷春難到但被東風草

自生

雪中友人晚訪登樓酌酒攤韻賦詩共二

首

獨坐方愁雲不開衆賓似約雪同來玉鱗徧洒
鴛鴦瓦金酒頻斟鸚鵡杯海若鞭龍朝貝闕仙
人騎鶴下瑤臺競揮彩筆吟飛絮慢跨銀鞍歌
落梅

雪中樓上好登臨况有同人愜賞心玉蘂似欺
山月皎銀沙偏助海雲深逐群呦鹿迷新跡接

翅歸鴉失舊林授簡誰能居客右詩才貴速莫
沉吟

立春日雪二首有序

王浚川謂遇雪每以袖承之更無五六
出之分分則似涉有意然花有五瓣六
瓣之不同又有朝開暮合朝榮暮瘁者
皆造化之自然非有意也戊午十二月
念日立春雨雪驗之果是五出詩因首
及之

六出今朝成五出新年預卜是豐年色迷樓外
玄雲結勢比灘頭白浪旋與客看山皆玉笋呼
童買炭費青錢雪花因暖多成兩不待梅花春
信傳

門前鼓吹青神過散酒延賓熾炭紅南浦雲屯
連北渚西堂霰集有東風河冰解結春聲動堤
柳將舒淑氣通粧點山城成麗景遊人報道雪
之功

立春後再雪

春酒傳盃泛紫霞
北風吹雪浩無涯
來從玄朔迷三徑
序屬青陽便五花
樹上棲鴉一色白
雲中征鴈數行斜
何人爲秉徵祥筆
好向今春紀歲華

風起如晴又不晴
宜春書罷獨含情
朝雲黯黯連昏黑
朔雪雰雰霏下紫
清青女素娥呈異色
黃童白叟動歌聲
隔年已有三登兆
天爲東人錫太平

立春日席上喜得方城楊狀元書

一歲欣逢兩度春

戊午年正月八日立春今春風

物勝前春水泮舊綠冰初泮柳染新黃色未勻
太史佳音勞寄我謀生巧計耻隨人菜盤椒酒
方延客共讀來書不厭頻

守歲

強欲留年戰睡魔哄堂絃管閒笙歌從前結局
餘生意最後持盃奈老何眼見陽和寒極轉心
驚節序暗中過短檠除夜燈花艷元日應知喜
氣多

秀才馬惟則喪其弟惟一詩以悼之

半窓風雨殺殘更春草池塘夢不成可惜長君
無伴侶始知造物忌聰明空餘大被兼長枕悶
對孤燈暗短檠隻鳳齊鳴一已失嗷嗷又聽斷
鴻聲

上巳三首

上巳芳辰賞未違流觴籍坐釣魚磯花心映日
沿堤吐柳絮隨風滿路飛耽樂衆賓及晚照雜
陳百戲競春輝吾身宿垢時常洗莫恠臨流不

解衣

繡江橋北東流水可滌塵襟蠲百病蝶翅戀花
臨几席鶯喉分韻與絃歌舞零點也堪同調脩
袂羲之不是過近午暖風薰似酒令人不飲醉
顏酡

上除風景樂偏饒萬丈天絲帶柳條此日晴明
蚤事盛暮春和煦鳥聲嬌輕擺不斷矜彈手款
折難持羨舞腰買笑莫須深惜費塵身雖潔鬢

蕭騷

贈訪道芝田高翁

逐歲遨遊不齋糧終宵坐伏睡魔王玉池時有
蒼龍戲金鼎驚看赤鳳翔子晉吹笙因跨鶴初
平叱石盡成羊請君勿走多岐路仙術無如魏
伯陽

端午三首

重午曾聞產孟嘗莫云是日不為祥辟兵共插
靈符好續命爭誇綵線長當戶相傳懸艾草誰
家初浴出蘭湯借衣授妓資遊戲玄武門前笑

太常

龍舟競渡興難乘盛節重逢思不勝未曉晝符
防毒蝎得時攪席嘆飛蠅旋收藥品隨時俗滿
酌蒲觴散鬱蒸夜夢賜衣仍舊景醒來虛妄好
無憑

謝政家居百不忙每當此際喜如狂葵榴滿眼
天中節蒲艾撩人分外香角黍猶生隣晚送黃
梅初熟客先嘗將臨夏至惟三日轉覺閒中日
月長

是月初八日夏至

暑中大風雨張龍岡寄書適至

風捲園林枝梓地更驅猛雨勢喧飀讀書不覺
忽漂麥探節俄驚已送梅白扇慢搖知僕倦清
罇雖具共誰開閉門孤悶方難破喜有天邊書
寄來

七夕二首

乞巧高樓非一端穿針獻果笑團圓巧如蛛網
將焉用拙比鳩巢亦自安七寶枕邊情未已九
華燈下夜將殘緱山白鶴真難遇若擬宗元文

不難

氣白銀河喜有兆

天漢中有白氣風土記以爲得乞之兆

風清玉

宇淨無塵瑞烟直上香三炷素影斜穿月半輪
天上佳期牛女會人間令節日時新停梭一歲
惟今夕促織何須聲太頻

題携妓送別圖

群妓留連一馬嘶行囊結束候前溪盟言附耳
期重會素愛關心忍解携雨後含顰花載道風
前捧思柳盈堤獻勤更有奴堪恨催說登程莫

執迷

謝鄭石南惠詩

別後詩來感不忘
鄭虔名譽播詞場
行邊每少長途費
囊裡惟餘寡和章
此日棲身聊濟郡
何時携手上河梁
可憐落魄蘓臺客
歲歲携家在異鄉

贈王杏里亞卿致政用舊贈詩韻

久行實政遠虛聲
亢直誰知悞一生
言路固然騰異議
鄉人自是有公評
過家每次如孤旅
報

國真堪任九卿晚節無慚官已免冰壺徹底有
餘清

簡楊東江都御史

月中自補登山屐雨後誰同涉水航念爾居憂
常簡出令予獨樂不相將無求世用心如石知
命年臨鬢未霜待得服除讀禮罷千篇詩賦爛
雲光

崔東洲亞卿寄到中麓草堂詩如韻成二

首自詠兼謝東洲云

久客心馳泉石側
允休疏出建章宮
每驚水荻憐頭白
喜有山花照眼紅
數日即看分健病
百年始可定窮通
靜修矜羨形如鶴
豪放猶能氣吐虹

晨遊不離清風館
夜宴如遊明月宮
堤上垂楊搖嫩綠
倉中積粟有陳紅
故人信斷雙魚遠
太史書來一鴈通
讀罷床前看寶劍
冲霄猶自氣成虹

附東洲原詩

萬流迴處孤峯畔三麓中間一畝宮
龍脉矗雲屏削碧雞聲催日海舒紅
蓬萊影對滄溟濶依岳光分戶牖通
地主愛奇今李白百篇斗酒氣如虹

孟渭泉大衆自川中寄詩依韻奉答二首
卮酒能分溜與澠別君豪飲又何曾
王通講學存中說嚴羽談詩得上乘
當日興搖雙玉管通宵坐對九華燈
詩來萬里遙相望明月危欄幾度憑

席前喜有酒如渾醉後高談憶昔曾入道不須
成九鼎參禪相與演三乘身中自有長生藥言
外難傳無盡燈別後新知誰可語南鴻欲托恐
難憑

附渭泉原寄詩

城東一水接淄澠弭節相過記屢曾博古無如
識寶鏡談詩真自解玄乘葱葱猶見園中樹耿
耿難忘夜半燈齊蜀山川萬餘里青雲停處望
常憑

廉訪使蔡白石過訪奉贈詩二首同韻

外臺肅肅凜秋霜執法兼餘翰墨香博學堪稱
周左史能文再世蔡中郎竚看北上朝 楓陛
暫為東巡過草堂久別重逢吾已老羨君年貌
尚清揚

別後心思耿不忘少年名譽擅詞場外僚已歷
兩三省登第今餘二十霜雲霧我甘為豹隱風
雷君自効龍驤會承 簡命登台輔賡和明良
及栢梁

贈鎮山朱方伯過訪

清如玉露泥金莖明比金波映玉繩南國共稱
真外史東方望作大中丞他年麟閣登朱穆此
日龍門愧李膺千里霜蹄猶偃蹇九霄風翮會
飛騰

壽李脉泉七十歲八月十六日誕辰

望後正逢初度日仲秋景色此為嘉人間涼薦
金飈爽天上晴流璧月華壽及七旬無白髮丹
將九轉有黃芽歷年自此應無限幾見桑田變

海沙

壽謝南岡用贈脉泉詩韻

壽臨七十精神健
誕日延賓情興嘉
喜見眉邊多道氣
不愁頭上有霜華
世間甲子難拘數
階下蘭孫競茁芽
仙術五羊能化石
身輕一鴈落平沙

四間四時行樂詩次韻一百首間有言及武事者亦安不忘危之意云

栽桑閒却栽花法
相馬全拋相鶴經
亭午日穿

泉眼赤早春煙鎖柳眉青
權將鴻寶藏空谷
莫
奮雄辯討不庭
人主壽昌先有驗
南方特見
老人星

鵲來林下消長日
遮莫沉酣在六經
遠眺城邊
江浩浩長吟河畔草
青青新生雨竹枝
當戶落
盡風花葉滿庭
睡起為農看
早晚松梢猶掛兩
三星

元夕家居思舊事
皇都佳節十餘經
天街月色
香塵淨
咸里燈光寒
焰青
鼎沸管絃紛
聒耳筵

開玳瑁悉充庭競奢火樹紅于火奪目星橋疑
即星

山上築臺能望遠學傍建閣爲尊經花開魯甸
三春麗煙藹齊城九點青糊口幸餘千斛粟潛
身只可一茅庭傍岩耕讀今何夕手撥沙書點
筭星

難得題名高士傳日長自草太玄經池中雨急
荷翻綠堤上風微柳漾青協氣依依連井邑祥
煙燁燁繞門庭避凶趨吉憑時曆豐歉還頒卜

歲星

夏初春盡禽聲變綠慘紅愁宿雨經一帶江雲
飛練素千尋石壁斷空青窮經懶效胡安國博
學休爲孫過庭禪定自能生智慧胷中羅列滿
空星

若逢閏歲難栽樹日落休看細字經星月一簾
秋色淡霜華四野燒痕青少狂有志清邊塞老
懶何曾出戶庭濁酒自斟還自飲地爐煨火撥
殘星

尋思得用惟農譜沉醉還來看酒經石磧千尋
秋水潤天涯一點晚峯青橫斜石徑通仙閣新
舊蜂房傍客庭水氣蒸爲千里霧池萍冷浸一
天星

儲竊爭如甘放肆元經豈可續麟經池邊洗硯
魚吞墨樹裏爭枝鳥泛青投轄留賓開夜宴侑
觴出妓鬧秋庭從今爛醉心無媿天上元來有
酒星

會心適意非奇遠一半傳聞一半經郭外好山

當戶翠階前茂草透簾青晚荷過雨香生座秋
水平橋冷滲庭尚記此間嘗避暑忽然換物更
移星

彈冠結髮羞王貢學讀淵明山海經池沼雨餘
千頃碧松篁雪後十分青崎嶇谿谷如天塹浩
渺煙波即洞庭乘興豪遊無不可閒愁贏得鬢
星星

典却朝衣權當酒平胡策微化胡絰雪梅映月
三重白官柳迎寒一半青忽夢朝儀思魏闕如

聞廣樂奏虞庭醒來彷彿天香在萬朶祥雲護
景星

面山結舍聊棲跡近寺為園好誦經冬柿爛如
仙掌赤晚山色似佛頭青何時炎漢虛前席莫
聽亡陳唱後庭前古事為今日戒空中星即水
中星

半生歲月成虛度仕路艱危已飽經不耐秋風
雙鬢白坐聽夜雨一燈青上書即日歸農畝杖
策當年謁帝庭知足二疏能不辱古人鑒戒

炳如星

何日生男承世業百年誤我是儒經
踈迂無復
弓旌召名姓難垂汗簡青能使河西知國法善
追漢北掃王庭世無知已成何用天上長明處
士星

閉戶學書窮鳥跡不如伸縮效熊經
詩成洒翰
花箋濕病起隨身竹杖青莫為微瑕捐白璧長
因無事讀黃庭新來悟得長生訣覽鏡何愁兩
鬢星

罷吏歸田十四載帶耕牛角日橫經風吹北渚
千層綠天共東峯一色青歲熟村中休閉戶化
行海外盡來庭大開文運銷兵甲奎次行看聚
五星

若望行人占鵲噪有關田力是牛經雲生東海
天邊白雨過南山分外青對客停盃調舞鶴呼
奴擁帚掃閒庭田家樂事隨吾取不用芳名耀
日星

自知命蹇官當罷莫恃才高國可經且放酒盃

逢李白喜聽歌調對秦青山高裊裊雲生榻木
落娟娟月滿庭此地幽深堪避世人間爭覩少
微星

少狂自負明三略白首何曾守一經烈士暮年
心尚赤故人相見眼偏青嘗因典禮觀周室不
復聞詩過孔庭無事且遊鷺鷺渚有時氣逼斗
牛星

習靜嘗為龍蟄法老來翻愛虎鈴經王通有意
譏揚素汲黯何曾拜衛青數欲驅兵清紫塞無

由攄策報彤庭青雲難附身難致甘作東方老
客星

喜向風前吹鐵笛時從月下了殘絰遨遊海島
三山秀占斷園林十畝青二麥抽岐迷北陌三
槐布葉遍中庭老農老圃吾皆是早起遲眠每
戴星

讀書若只圖高貴金紫銀青污五經身佩金魚
衣袂紫手提銀印綬垂青良平決勝居帷幄顏
牧由來在禁庭今世只知輕武弁何人可以應

文星

祖榮稽古非為貴牟利焉能識聖經但得抽黃
赫對白即期拖紫與紆青名賢定不從周黨廉
吏曾來出漢庭名利場中如勘破雲開現出太
陰星

阮籍猖狂能傲世韋賢父子總明經心如澗水
塵難染節比山峰聳立青求友必先求故舊戀
官不若戀家庭欲招名士排華宴恐動天文聚
德星

難得壯年長不老談兵誤我似窮經黃花鎮上
花生色細柳營中柳自青地欲呈祥龜出洛國
能止殺鵲巢庭迴思往事堪垂涕不落旄頭落
將星

前此名將如馬勇梁震
等數歲之間相次殞沒

兵家不但明行陣秘在陰符太白經不測龍潭
秋更黑難登鷲嶺晚偏青揚威必欲窮沙漠習
射何須在殿庭英主重兵能若此宜其動即破
妖星

病按古方曾得效堂開書院為傳經外揚不可

重歸墨採藥今當代踏青踪跡祗宜終草莽勲
名難得著邊庭誦書搗藥常無寐破屋寒窓夜
見星

不飲蘇公能酒譜知音諸葛著琴經

中興書目諸葛武侯

著琴經一卷述琴之始及七絃十三徽之音意鏡中綠鬢難長綠天際

青山不斷青瑟瑟秋風鳴古木蕭蕭夜雨洒空

庭五更天霽催農務殘月相將數點星

能使此身為保障絕勝舉足即為經霜侵甲帳

鬚長白雲壓天山色不青兵向回時行鳥道師

臨老上掃龍庭為防夜警鳴刀斗敲落天南海
北星

古來將相原無種經術須將世務經債帥擎盃
浮蟻綠佳人疊髻擁螺青杲卿斷舌忠唐室衛
律將身陷虜庭錦帳藏春驕白馬安能死義錯
華星

授徒不在分章句得意忘言默會經帶雪白梅
如雪白出蘭青色比蘭青羣居言必稱先聖靜
室心如在廣庭機事不留情易見一輪皓月滿

天星

古字難尋蒼頡刻今文幸有伏生經年來好古
心無倦夜讀燃藜色自青經學由來能治國發
言何貴但盈庭文書秘府誰為主東壁煌煌有
二星

北地多因羊致富西方曾用馬馱經歌兒裙染
榴花艷醉客盃浮竹葉青梅月徘徊侵夜榻草
花紅紫闌春庭殺羊酹酒紛歌舞夜誦番經襍
彗星

可遣閒愁惟繪事能通戰法是基經莫須善畫
同崔白但學知兵似狄青鐵騎真能犁草地銅
符豈是仗椒庭生前已極人臣貴歿後還應為
列星

戰陣頗窺司馬法從今不閔度人經山高日落
揄關黑斗轉春迴柳塞青蘇武終能持漢節包
胥何故哭秦庭射鵬弓勁彎如月鎮虜臺高可
摘星

鉄壤十年三大有兵戈到老幾曾經不將眉戴

夢斑白好采歌謠紀汗青麗日舒長真化國仁
風浩蕩出明庭山人不善觀乾象疑是三齊照
福星

放棄還鄉多樂事何勞怨刺作騷經水浮浴鷺
平分白天被歸鵝點破青自有隣翁爭坐席更
無貴客擾閒庭方憂久旱逢霖雨夜月原來離
畢星

決計明農兼市藥還藏武緯及文經一園映日
花明媚兩岸梳風柳暗青雨足禾麻迷隴畝春

深藥草長階庭門前巨石堪盤踞父老相傳是
隕星

歸田自有田家樂秋月春花幾度經屋角雲生
遮戶暗塔前石裂破苔青卧遊舟內山隨枕好
潔朝來水洒庭自喜今年田有獲休嗟往事若
流星

床頭雖是存周易袖裏惟携道德經
語妙過天下白俊才勝似海東青
一江綠水分吳越萬丈紅塵遠徑庭
僻地著書同柱史黃冠道扮繁

猶星

勅下得歸田里日途中舊館又重經當時幼主
俱頭白在抱嬰兒綰髮青新葛落機裁野服古
書插架列山庭閒居有幸同劉向晝讀遺書夜
看星

身非季世龍門子酒誥無勞荅食經老至不遭
兵火亂朝炊惟見竈煙青方驚臘雪迷丘壑忽
復春華照院庭身後聲名真敝屣眼前歲月似
飛星

閒時始覺忙時苦往事如同眼下經春到園林
隨處綠夜來鎖闌夢迴青餉邊馬走盤龍路典
選班聯振鷺庭三百同年零落甚四方相望若
晨星

出入防身藏寶劍朝昏漱口誦金經心如古栢
長無改操厲蒼筠寒更青浴佛近遊黃葉寺懷
人遠在紫薇庭今雖禪寂吾忘我兩度曾為出
使星

畫中妙理曾搜索世上人情久慣經誰道范寬

惟水黑共稱立本善丹青琪花爭發白雲寺幽
草環生甘露庭更掃天文為潤障森羅萬象拱
辰星

身輕力捷能登眺辭却經生不說經日落遠山
凝暮紫雪深衆樹現冬青招邀酒客同詞客汎
掃前庭與後庭農事一年分早晚全憑拭目看
中星

散仙不闕名臣傳澤國相宜惟水經風急芰荷
迎舸綠夜闌燈火向人青只須折柳樊農圃不

必看未出內庭養馬農家為上計每因良夜祀
房星

眼前異景憑誰語心自知之身自經兩道湖光
分鏡破一池荷葉疊錢青清風拂拂雲歸舍瑞
靄霏霏月可庭禾黍秋成今七夕佇看銀漢會
雙星

因忤權臣遭斥譴甘為林下老明經
根如鐵海棠鐵柳絮飛綿葉却青無數
蔽野成文鬱鬱每棲庭樓頭畫角吹殘月更殘

漁燈撒亂星

若欲不為寒餓累請看范蠡種魚經
日生海底雲霞爛柳醺江頭波浪青
與客閒遊登畫舫呼奴急去閉芳庭
隨時取樂無他慮夜夜簷前有

瑞星

三省不如通一貫莫將列傳去求經
垂楊頓改迎霜色老栢偏能冒雪青
要挹存心為處事不分私室與公庭
鑑空百物方能照世羨衡平為有星

仕宦亨通宜退步林泉熟讀淨名經中天月麗
天花墜東海雲生海氣青天下雄文稱翰苑寰
中協氣出宮庭堪嗟世變人心壞誰是豪賢上
應星

新來頗與高僧暱慧遠相隨夜譯經不羨金章
拖綬紫堪羞玉臂貫銅青掉歌咿啞風迴枕香
靄空濛月半庭九月授衣今七月仰觀天上走
心星

平生志行希宣聖惟在春秋與孝經金帶今橫

三品赤寒氈曾坐十年青定將姓字題麟閣權
借刑名駁訟庭筆下文光赫耀日匣中劍氣直

衝星

此下三首贈張龍岡以
大中丞陞南太理長卿

鍾鼎山林稀會面對床誰與析疑經吾今獨苦
頭先白子昔同升年正青將往南都官棘寺暫
旋東魯省宣庭判花戲綵原同道南極星兼執
法星

曾為太僕遊滁郡南北官程兩次經拖練湖光
浮淺碧揉藍山色染深青理卿擢自棲烏府廉

吏仍居旋馬庭指日登台還踐斗早朝帶月更披星

相法要知生共剋通神照膽乃奇經

相法有通神照膽經

面顏長帶明而潤氣色惟嫌黑與青自喜山容兼野態元非日角及珠庭何人寫照浮其實炯炯雙瞳類曙星

半百行藏今已定何勞更弄玉衡經寒生幽谷蘭猶馥春到陽厓草又青勿用潛龍淹魯國不鳴一鳥止齊庭老年莫話當年事手撥天關袖

拂星

良夜深秋長是醉醒來時看藥珠經床頭甕煖
新醅綠堂上藥寒舊蠟青追憶宦遊淹客邸久
羈名利遠親庭歸來負郭田千畝勝作微垣一
小星

微逐流塵為客久舊遊佳境似初經爐中縹渺
香煙細橋畔招搖酒幔青棄却少卿離宦海偶
逢醉客過禪庭夜來打坐長無寐聲震如雷有
變星

李冬初六夜星落有光燭天聲響如雷自
宋南直至西北

從今緊閉談天口袖裏長携道藏經持鉢降龍
潭水黑開籠放鶴野田青人煙不斷千家市風
雨難遮一漏庭城市久藏迹世客海中亦有無
名星

白藏忽復迴頭至朱夏如曾轉眼經風急池蓮
搖羽白天晴顛棘蔓絲青秋生樹杪涼侵席斗
掛城頭月射庭獨步閒階何所見南飛烏雀伴
稀星

男耕善識遲和早女織平分緯與經熟煮山精

松火熾生調野菜海鹽青隣家借畫遮顏僻入
院驚心如我庭間里交情同一室依巖結舍密
如星

洗耳惡聞塵市語清心專聽法王經風吹密竹
山齋冷日映垂楊野店青逐歲雲遊輕去國通
宵露坐不居庭叅禪悟道多奇跡見者驚疑是
謫星

窮通得喪尋常事晦暝陰晴倏忽經貪長花枝
遮牖暗新抽竹笋過隣青晚來雨歇雲歸岫行

見雲拖雨洗庭色正芒寒光萬里麗天今夜有
繁星

能把玄關通一竅何須萬卷讀丹經仙方點出
黃兼白俗眼難分皂與青呂祖降時雲滿屋高
人去後榻懸庭步虛聲裏香煙裊晝拜明師夜
拜星

東國山河稱十二遠觀形勝據圖經潔清東注
無窮綠齊魯西來不了青無客莫登臨水閣有
時斜倚面山庭要知分野元何屬角亢虛危及

氏星

飛昇寂滅元同調
往日曾參二氏經
靡草靡能經夏綠
長松長是四時青
偶從道院遊禪室
為掃新齋毀舊庭
戒律堅持終了悟
一方滿月一壇星

燥疾宜居卑濕地
求仙定要熟仙經
岸崩雨溢江分綠
風掃萍開天倒青
一日悟來登道岸
三生有幸列仙庭
吾身不啻千金重
世上浮名直幾星

坐破藤床懶出戶補抄缺卷讀蓮經

天下蓮花經止七卷

予為寺補其三今為全經矣

滿池夜雨朝凝碧排闥春山晚

送青英謂天高欺暗室只綠地暗起高庭風吹柳絮紛飛雪日射沙洲閃爍星

寂坐月餘無箇事兩株松下一函經澄江印月連城白峻嶺浮嵐遶郭青波底潛鱗或躍岸山梁雌雉每窺庭仰瞻玉宇無塵染逼近銀河倍有星

徒新借劍心難遂分靈和政今再經皎皎食場

憐駒白營營止棘惡蠅青放流不欲同中國棄
置真如在掖庭得罪當朝權貴府相知一夕遂
分星

杜老獨推覃氏子以其出處必須經蕭蕭鬢髮
遊燕素歷歷山川入魯青獨木橋通三岔路雙
流水遶五楹庭地中勁氣無如濟百脉泉飛擬
逆星

人情更比秋雲薄世態猶觀博塞經逝者如斯
江自綠久而不變栢長青得遊韜晦逍遙境何

羨承明著作庭禾稿喜逢風以雨誰知昨夜月
從星

事閒地僻書宜讀特遣兒童遠借經
美稼平鋪盈野綠高梧遠望半天青
入山客路臨花塢傍水人煙結草庭
存有幾家猶自給幾家轉徙已零星

書藏萬卷何書好得用今知惟道經
翠栢無殊冬夏翠青山不老古今青
苑邊舊卧累累塚河上新成殖殖庭
庭內修真能住世免隨荒塚密

排星

百工技藝寧無裨炎帝明農自有經智者田桑
特地茂愚夫稂莠比苗青人家運來行無路婦
女看蚕坐塞庭恐有情農父勸戒相呼惟視故
明星

學會酣歌兼醉舞渾忘辨志與離經甕中酒盡
千鍾綠簷外山眠萬仞青未報國恩時望闕盛
張家樂夜喧庭蛾眉嬾月原非月螢火飛星不
是星

家本三齊稱勝地熟知海藏與山經山村春暖
川原媚海岸天晴島嶼青身在林泉心魏闕遠
遊寰宇近園庭壽能百歲如千歲天德生來拱
命星

戶曹試政三年久塞月胡霜嘗再經邊遠似知
離客苦春深不放柳條青素餐此日居家塾餽
餉當年走朔度穩睡遲興惟待日征途何苦只
侵星

秋杪夜長難久睡覺來席地坐三經

說苑孔子
因於陳蔡

坐三經
之席

東方月出天疑曙
南畝禾收地不青
吠犬驚風登敗壁
啼蜚帶露近寒庭
難求醉酒經千日
怕見淒涼有四星

風江夜渡能無懼
只為長年曾久經
霜月穿林偏慘淡
稻花夾岸劇蔥青
漁翁相與遊深瀨
嘉客傳聞已在庭
收拾綸竿權罷釣
歸舟似箭棹穿星

有興登高寧憚遠
坡前古廟往來經
年餘雪積簷中素
山上雲生足下青
舉目遙觀無彼界
好

花多處是吾庭耽遊抵暮勞庄客照炬相迎四
野星

已解金丹四百字無喻三十老明經臨爐漸漸
成黃白拾芥輕輕取紫青自得真傳潛道觀貌
看相繼踐台庭凌晨薄暮無他事禮罷元君又
禮星

生來不識天文志近日閒觀甘石經歲盡周天
方盡度春迴枯木又迴青月隨斗柄旋纏次夜
吐寒光照院庭十二日辰俱指遍世稱天北攝

提星

郊外風光真可賞
迎春數日又還經
頗疑此地林偏茂
乃是東方色本青
寒盡陽和生嶰谷
暖溶冰溜繞幽庭
一年之計春為最
恐悞耕田屢驗星

離却室家宵面壁
招呼道友晝翻經
阮生傲世眼能白
魏準驚心體自青
破夢晨鍾來竹寺
駭觀秋水漲莎庭
青銅不照無多日
梳髮俄垂滿面星

學禪今愛高僧傳登第因明博士經被斥迴瞻
楓陞遠分恩難與荔芳青燈光輝映分匡壁蘭
蕓芬敷長謝庭百世太平今可卜 帝星聯座
耀前星

叅禪要在超三昧淺學徒誇博九經濫與太常
拖綬紫早遊鄉校曳衿青四維不絕方為國五
細由來不在庭社稷有同盤石固周親列國似
分星

不驚寵辱方為貴會得真如那用經黃菊在黃

蒼翠紫白楊樹白葉偏青門前即是登山路
扁上高標望海庭隱處追思遊宦日郵亭傳食笑
馳星

樂水樂山隨所遇事君事父賴葩經雲迷萬壑
連天黑雨洗雙崖映日青濟水以南俱隱地門
屏之內即為庭村居尚惡人煙夥東舍西隣擬
聚星

使傷黃犢耕山地乾殺蠹魚讀壁經惡草勤鋤
猶自茂佳禾久旱莫迴青興狂飲竭地黃酒福

薄難登天子庭為官為農俱不徹立身錯認定
權星

醫始軒岐著內經內經真是聖人經春迴地上
千花發雨足山中百藥青眠食專心調五臟朝
昏淨手誦三庭謂黃庭內
景外景也自然無病躋高壽奚

用逢人講五星

賢于堯舜吾夫子刪述之功在六經有德無權

曾謚素

舊稱素王
今復先師

遺編斷簡永垂青二龍獻瑞

曾旋室五老呈祥忽降庭大道昭明邪說息太

陽一出掩羣星

在任長看廉吏傳退休只愛衛生經
剖開紫蟬黃初溜思食黃柑色尚青
野鳥依人飛入幕山魃戲客故臨庭
夜來覓句渾忘寢枕畔驚看墮一星

外侮內奸為弊久謀臣何以作常經
食貪熊掌金盤羨賄愛鴉翎寶鈔青餽
餉長愁窮內地弱兵豈可敵胡庭
不勝棋役民勞瘁搖動長空少定星

為儒要得言如行作吏誰能律引經禁火有防
民夜作斷煙鮮見竈飛青黑烏未定棲誰屋白
蝠曾經達敝庭良牧若能勤撫字下民永不照
災星

仕進豈知恬退樂吾今始得洗心經一簾梧月
秋容淡萬壑松風曉色青貴客遠臨牢閉戶高
人投刺始開庭進階久望郊天赦不見先明貫
索星

甘心溝瀆無人識堪笑匹夫苦自經驟雨傾盆

雲溪墨垂楊夾岸水分青非關閉塞賢人路只
是便安隱者庭碧漢雲開千里月良宵風定一
池星

贈馬相士有序

嘉靖改元長清相士馬小子一見極為推
許予今衰老無成不能副其初意別來三
十八年今復見之年已八十相術尚不減
於少壯時於其別也贈以是詩

生來不是封侯骨投老甘為山澤癯自幸一身

知進止莫憑兩目定榮枯高年善相君猶爾當
日相推我負吾豈但勲名諸友後病衰今用兩
童扶

贈余星士予素不談命余星士懇乞贈詩
不得已以此應之

歲久惟予餘此生一時無復舊同庚

二十年前在朝在野

同庚者不下十人惟予一人在馬社中長煖鷄豚酒

江上休寒

鷺鷥盟冰鏡照來雙鬢短山精服藥自

漁自判生涯了不必從君問子子

舊省長許石城自南都惠詩依韻奉答

曾離選部已多年直道歸田世無賢運社日長

招會友花臺風快挾飛仙真論廣自女中得麗

句遙從白下傳衆望召君猶未召能無清夢到

鈞天

張東沙尚書寄惠芝園文集且以李太白

過許久無便力報謝用石城詩韻奉懷以

後俱石城韻共七十六首

巡撫西川憶往年上卿南部至今賢羨君詩擬

張平子規我非李謫仙竹徑堂開賓從滿芝
園集出世入傳報書未附隨陽翼望斷南雲萬
里天

寄餘姚謝汝湖亞卿

堂卿謝政自先年會有徵書起舊賢安石素懸
江左望知章暫別欽中仙崇階滾滾三公貴華
胄遙遙百世傳門館畫長鈴索靜喜看化日麗
壺天

贈郭似菴二首

鄉舉初逢各問年今番放榜號多賢讓君巨筆
文章伯媿我同舟李郭仙謫戍太離鄉國遠候
書難托置郵傳兩京薦剡如飛上立俟金鷄下
九天

隆平國運正當年武用英雄文用賢可惜才高
如子者奈何降作出班仙朝中劾跡奸謏懼塞
上奇謀將士傳莫為困窮添白髮且將得喪付
蒼天

寄羅念菴

念菴羅子好同年遺棄何人肯尚賢拂曉治田
偕衆叟當時及第領羣仙談經陳說皆無取訪
道新聞得異傳試看鵬飛須有日扶搖萬里翼
垂天

寄邢雉山

相門相遇正青年

初會雉山於翟石門相國宅

三百人中尔

最賢代草共稱無二士探花醉宴第三仙敲碁

是處皆無敵

雉山以圖碁擅名

工篆留都自有傳

雉山同鄉

景前溪能篆書亦登上甲

不日重蒙金馬詔五雲深處拜堯

天

寄翰林舊相知

國史曾來時繫年歷年英主寶惟賢不須擊劍
三千客自有登瀛十八仙翰苑新書從古重鑾
坡舊事至今傳經筵顧問螭頭筆三事從容在
禁天

贈王杏里

外僚敷歷廿餘年至處人稱君最賢南國豈能
長借冠瀛洲衆望早昇仙忽騰物議殊驚聽未

久人知出妾傳清白操持終不改此心真可對
青天

贈李脉泉

繁華生聚太平年君善知人相渴賢但有徵書
先李氏不須逃世效梅仙福逃海外世人以爲得仙賜環威
望當朝重作賦文才後代傳竚立玉階方寸地
長朝金闕九重天

贈謝少溪

將棊度日酒爲年

杜詩且將棊度日應用酒爲年

局戲何如中

聖賢我喜敲棊君善飲人稱豪客與閒仙兩朝

恩命千鈞重

乃翁任監運副曾受褒封

三謝文章百世傳即

有弓旌招隱逸朝天歸後又朝天

兄九韶弟九式俱能文

贈張龍岡

時運如逢大旱年高宗專任作霖賢委蛇東省

稱良佐出入西山或遇仙有象太平能坐致無

轂至樂不容傳廟堂柱石須公等規制巍峩擬

奉天

龍岡管西山天石齋屢運大柱等石奉天門廢成致改名明堂及大朝門

贈劉後峰

青瑣黃門侍從年同時諫議獨推賢一塵萬里
投荒客十載三齊行地仙人靜展舒詩卷讀客
來誼笑酒盃傳囊存諫草林輕棄煉石乘時再
補天

贈楊東江

解組居憂已兩年璽書不日即徵賢朝中用子
為良輔林下留子作懶仙芳譽由今寰宇滿奇
功自昔塞垣傳追遊此際休嫌數別後相思各
一天

贈門人王大峻舊法曹

記著拾遺王子年何如篤行仲容賢數年遷謫
紅塵客指日飛昇白晝仙彼美丰儀誰不羨斯
文衣鉢汝能傳高才自古終難棄合置鸞坡近
木天

自詠題扇面兼扇上漢唐四賢畫像三首
衰憊多因倚少年老來全仗藥囊賢村居事簡
渾如客病起身輕即是仙背後羣言從爾毀日
間三省習師傳卑高位列吾中處俯仰何慚地

與天

肥瘦何分冬與年

古諺云肥冬瘦年

養民善政自來賢

陳湯方外塞旗將高士筒中躍筆仙

高士置筆竹筒買者

投錢其中筆自躍出踴筆仙

功業自存史冊上姓名不借蔭

牙傳九重夢裏將登盡墮地醒來隔一天

外夷每問裴公年

度名震四夷每中國有山使者夷必問其年貌何似鎮

重朝端有此賢名著青編真國士堂開綠野若

天仙佐唐相畫人難及平蔡軍功今尚傳天遠

退閒能益敬吾身以上即皆天

贈門人羅節軒秀才

多才自媿李延年
政史君同羅秘賢

泌曾著路史

及

早文成堪中選
有如羽化得登仙
滔滔奇思毫
端湧燁燁芳名歷
下傳拜舞堯階欣
釋褐祝君
遐筭願齊天

賀蔡白石陞江西右方伯兼及朱鎮山左方伯

東方饑饉屬荒年
藩臬入稱賴兩賢
朱邑將為
司計長蔡經曾遇麻姑仙
新遷定作西江福舊

政依然東國傳樞府即看登俊傑運籌帷幄淨
胡天

贈少崇張舉人

繼兄登第後三年東省齊名有二賢勤學一朝
為貴客吉徵幾夜夢遊仙驚聞廷對膺魁選不
獨鄉書可久傳萬丈文光搖北斗一生高義薄
雲天

贈史燕峰托蘇雪簑寄穀

修渰窮民可度年雄紫義氣自招賢能文早列

金閨彥勇退堅辭玉署仙玉女有潭為國重
翁妙術待君傳此行賓主交相得丹道誰云木
破天

贈雪簑

懷竒端可衍長年侮慢猖狂若自賢不蓄室家
方外士漫遊湖海醉中仙醫方蹴鞠聊同俗字
畫琴聲得異傳金殿成時償夙願此心庶不恨
終天

雪簑誓願在名山
起金殿塑神像

戲贈少崇寵妓劉五

芳卿正是破瓜年色既鮮妍人又賢幾夜有勞
文苑客一時得遇武陵仙酒盃勸得羞容減羅
帕偷將密意傳日照牕紗猶穩睡夙興嬌怯曉
霜天

詠仙學兼自嘲二首

當日風流美少年如今僚倒豈為賢幾番病後
全成叟漫道年前半是仙水火煎熬迷後學乾
坤顛倒孰先傳三更湧出天邊日短棹撐翻水
底天

一朝聞道不論年未必前賢勝後賢術士妄言
朝玉帝庸流豈得謁金仙丹方易遇人難遇靈
藥雖傳火不傳景促易過駒隙日學疎坐望井
中天

書齋題壁

經生屹屹以窮年黃卷終朝對聖賢簾影斜穿
雙燕子書聲驚舞一胎仙畫前有易幾先洩剛
後無詩妙不傳坐久令人神思倦掩書出戶望
江天

知止二首

生當舜日與堯年君聖由來臣自賢在告金閨
無李姓修真玉籍有名仙寧甘貧賤吾何慕欲
上謀猷孰與傳拂袖東歸齊魯地側身北望紫
微天

村居癯羈任吾年廊廟經綸豈乏賢久繫名韁
非智者不嬰世網好修仙媿無實行同鄉重浪
有虛聲空谷傳坎止流行隨所遇歸途莫待草
連天

閒居憶友二首

故友睽違動隔年
目中鮮見有材賢
深山好作逃名客
幽洞思逢脫骨仙
莫肆遊談搖國是
且將風善永家傳
閒心最愛琵琶月
豪氣何須劍倚天

病似黃楊厄閏年
一心仍欲接名賢
朝遊恨少同心侶
夜讀期來太乙仙
酒速近隣殊易致
書馳遠友若為傳
飛鴻難倩雲垂地
錦鯉無憑浪拍天

論仙聖二學四首

二十年前方壯年月勤舊業日親賢成仙妙術
如成聖望聖真心勝望仙九患在除惟應加力遣學
九患六經不但以文傳未能得道先登第時值
飛龍正御天

讀書忘倦憶韶年剖破藩籬耻獨賢克意要為
天下士成名奚啻月中仙座間良友皆同志教
外明師無別傳閉目幾朝閒靜室舉頭三尺蔚
蒼天

風景新年似去年只爭零落舊時賢
九還煉就長生藥千載能為不死仙
巴里俗音容易得廣陵妙譜杳難傳
一朝悟得黃庭理超脫塵寰別有天

如今皓首昔丁年五十無聞豈是賢
太上忘言優入聖人間凡骨豈能仙
玄關必自心神悟妙理無庸口舌傳
道在眼前人自遠終身仰望若登天

讀史偶述二首

多病無眠夜抵年挑燈讀史羨前賢傳書柳毅
逢龍女苦節辜君號鹿仙辛孟與鹿豕遊號鹿仙季子聞
詩知古樂叔孫制禮肇臚傳蘇章持法人難及
堪笑清河倚二天

案下持金狎妙年秋胡悅色殊非賢杼投曾母
因三至柯爛王樵遇二仙莫灑城狐虞有損豈
知市虎出訛傳廢書起嘆難成寐坐待銀河沒
曉天

送蒲州吏目袁一新

之官蒲郡正芳年扶植全憑太守賢末位勿憂
難作吏布衣爭羨若登仙早敷善政民心慰懸
聽歌聲衆口傳道近莫勤鄉國念太行中斷不
分天

自省三首

靈藥成時可引年生平遠色急親賢不携私妓
兼官妓要識人仙與鬼仙古訓眼前常日省謗
言背後任風傳易盈鼯鼠河中水小見醯鷄甕
裏天

村有良田人有年朝無俸位野無賢雄豪文讓
眉山老枯淡詩同賈浪仙藥熟長招青鳥下技
高似出白猿傳生平一事猶堪取仰畏踈而不
漏天

力田屢幸得逢年林下同遊有七賢

同鄉自臺省方岳一

時歸林下者甚衆

門僕報來不速客鄉人目作大羅仙

飲情酒竭還須買適興詩成不用傳浪喜年前
通大道只今猶是管窺天

謝客讀石函記感悟

六十欲臨年莫効方人賜也賢懸榻從今
辭故舊閉門終日學神仙石函有記由心悟丹
道無言難口傳雞犬吾家俱過望何時拔宅共
昇天

病中讀道德經感悟

蹉跎學道動經年諸子無如老子賢對客高談
仍壯士迎醫已疾類癰仙閒愁莫把雙眉蹙妙
法不容六耳傳千日無聞須有日後天頓悟即
先天

詠仙學

暮景難同曷盛年不能希聖與希賢 帝都久
別青雲友人境深藏綠野仙要悟中玄為自得
羞稱下學可言傳道成端得延長筭我命須知
不在天

冬月祖村會客

同遊南墅值殘年媿我難稱地主賢歌舞家童
駐假坡笑談座客總真仙雖云隱僻鄉村遠抵
恐風流城市傳莫棄卑微輕遠別不時朔雪洒

冰天

詠象碁

坐守楸枰不記年，用心無所此猶賢。休官久作

林居士，對客堪稱橘隱仙。妙法近從溫國得，司馬

溫國公有微辭，原是陝州傳。得陝州呂氏宅，掘塚

世所為花陰覆局雲侵榻，自許何殊小洞天。

譏學仙之失

轉眼流光感逝年，分陰能惜足為賢。及時了道

青城客，與世無求玄圃仙。言外指歸難定擬，書

中疑信各相傳若還錯認從來路白首無成莫
怨天

聞道後追憶舊事

朝無倖位太平年田野搜羅隱逸賢上疏一朝
辭帝子投辭兩度拜天仙苦思不免眉峯蹙得
道能將心印傳尚記清曹當事日言能悟主力
迴天

季冬望後二日過磨上庄觀新立石有懷

楊東江

東鑿重來已過年亭前坐憶舊遊賢氣豪可奪
三軍帥望重終躋八座仙石色遙分山色秀風
聲近並水聲傳一冬寒少因無雪眼底春廻和
煦天

詠奇石

苔侵雨蝕不知年拜石嘗聞米芾賢栗栗不群
如勇士亭亭孤立類顛仙古齋老叟名難沒有邑
濯纓亭置大石可愛乃古齋老文簡劉公事
叟張受益所居亭久圯石今存
可傳元文簡公劉敏擬欲栽花相掩映直須春
中與石為友

日養花天

贈田間叟二首

淡泊無營太古年詩書不讀子孫賢莫輕雍里
村田叟堪畫管丘水墨仙李成三世為農衣食足
一鄉善士姓名傳幽居遠出三山外石磴高懸
一線天

花開花落是周年那解思齊得見賢若問前身
金粟佛此生難老赤松仙三椽蝸室同妻住半
部牛經是祖傳冰月一爐松葉火春耕笑聚甕

天

偶述近况二首

食龜存甲為占年年稔
堪封比屋賢
洒掃應門
黃豎子詩文代筆紫姑仙
瓦盆注酒終朝醉
石室藏書有日傳
不但窮通難在我
細微飲啄亦由天

一得年書便算年
十年多值牧民賢
三冬誦讀
三冬業一日清閒
一日仙
舌底長將真液漱
街頭莫紀秘方傳

諺云點的銀出的神
愈肯街頭說與人

屈原不必

為天問萬事何能逾彼天

壽楊東江

憲府方當強仕年立安邊境眾皆賢

解王林
衛父

雲川
等堡

食能量腹聞中史道遇龐眉得上仙揚

清風為郭畏蔡沉書傳本朱傳

東江三
世業書

壽辰

在三冬後晴暖如同二月天

殘冬家居追憶舊事

在朝交結盡忘年僚有常賢相董賢祇憶

期子若

盧吏部欽
字子若

風流文物慕蘇仙

逆時有徵書下塞上希聞羽檄傳久在家居冬
後盡行看柳絮又漫天

脩省

莫縱荒淫自斷年上師大聖次高賢勿輕吳下

阿蒙士堪笑河東項弁

仙項曼都學仙不成諒
言玉帝前失儀被斥

阿練號為

若銜虛聲來物議務脩實行足人傳

平居作事惟諧俗仰視真能不愧天

讀西漢書

漢書體例號編年帝紀無如文武賢宣室席前

稱賢傳輪臺詔後悔無仙百家罷黜文章盛萬
物豐亨歌誦傳楚戰秦苛餘喘息久陰陽曜朗
中天

皇朝頌二首

頻將肉帛賜高年舉士非由左右賢將相古來
寧有種智愚悟後總為仙異徵自有臺官奏盛
事金縢太史傳惟願歲登民食足萬民原以食
為天

運祚靈長億萬年臣無病國與妨賢長劫未歸

雖愚父不識干戈即半仙
北上星軺奇物貢南
來露布捷音傳野人際此
懽無盡閒看梅花媚
遠天

經過古墓有感

鶴歸華表又千年荒塚難分
愚與賢今日可憐
俱失主當時何不早求仙
槎枒古木人爭伐剥
落豐碑名不傳莫若生前一
盃酒終朝醉唱鵠
鵠天

村翁

小有燕逢大有年田家多獲即為賢有時撒網
為漁父長日登床作睡仙破局碁惟隨手應無
絃琴不用音傳一身之外吾何慕下有青山上
碧天

歸隱學道四首

吾年今已過中年作室猶虛肯搆賢吏隱曾叨
華省貴宦遊久伴玉堂仙藏身深得林泉味籍
口休從朝市傳夜雨龍潛池沼底秋風鶴唳浹
寥天

得隱今非卜隱年
佯狂莫似接輿賢
久居城市同流輩
若在蓬瀛作上仙
八百飛昇拔宅去
三千道德出關傳
思凡念動超凡阻
鄙見何殊盆戴天

祖帳都門不待年
路人曾嘆大夫賢
潛身不復朝天子
回首忽為平地仙
吹動鳳笙王母降
欲知鴻寶至人傳
一年修道忘寒熱
酷暑今臨大雪天

上書投劾得歸年
不肖如何濫四賢

詩有四賢一不肖

訪道願從逝世侶休官豈是落凡仙隨波入影
真難得空谷足音不易傳水濶滄溟吞陸地峯
高泰岱插青天

挽李愚谷二首

豐稔連逢羊馬年

諺云羊馬年廣種田東方連年荒歉道多流亡惟敝邑及

樂安已未戌龍蛇已過却嗟賢

語云歲在龍蛇賢人客嗟愚谷

午兩年頗收為憂幸而己過乃卒於今歲生前未作朝中相

死後應為地下仙詩已成家名不沒文能華國
世爭傳子方十五妻三十痛哭哀哀喪所天

甲子重逢已未年

愚谷原已未年生

病沉一夕忽淪賢

夙稱齊國無雙士曾宴金門第一仙
起廢有時今不待持身無玷後應傳
生才主用成何用有此遲疑欲問天

解嘲

耦耕勤苦度流年尚友長懷沮溺賢
鶯韻嬰嬰聞喚友蝶飛栩栩夢遊仙
見人儉約深相慕謂我豪奢總浪傳
每向寺僧同飯素喜看世界接人天

悼岳武穆

龍蛇陸走亂離年
金國兵強勝左賢
戰陣堂堂惟岳將
旌旗獵獵駐朱仙
汴京久失中原險
和議原從北虜傳
一自錢塘屈死後
誰能關地更開天

無題

不見嬌娥年復年
却將好色易賢賢
病沉沉約風流客
夢斷襄王雲雨仙
喜報燈花空我負
詩題紅葉倩誰傳
終期柳氏歸韓翃
只恐楊枝別

樂天

論仙學得失

元陽不漏壽千年上可神入下可賢半世冥修
終畔道一言超悟便成仙從來簡易為真訣但
涉艱深失正傳漫說城南惟尺五最高三十又
三天

元日立春

元日逢春幸此年足占家裕國多賢烘堂穀酒
爭邀客闔邑絃歌若降仙北岸柳容將欲展東

風花信已先傳菜盤恰與辛盤會總慶初陽別
臘天

元夕二首

三元之夕接新年慶賞無分賢不賢奇貨遠來
千里客香車穩載九天仙金燈照夜九三照銀
漏傳更忽五傳遊騎滿衢香滿袖華筵當戶月
當天

健步觀燈又一年良方却疾賴先賢豈知煙井
千家市幻出蓬瀛三島仙銀燭搖紅風不定祥

碧畫難傳高樓携客同登眺燈火煌煌照
四天

月下贈郭五遊

家食追思旅食年宦遊何似五遊賢
雲弘景為山主服石馬夷得水仙
久客不携家室累遊人難免姓名傳
風流調笑娟娟月露坐長吟耿
耿天

附石城原作

推轂同升憶往年東曹冰鏡愧高賢
看拋朱綬

辭清禁闥向瑤臺訪列仙書記汗牛人不及文
成倚馬世爭傳異才合置絲綸地會見徵書下
九天

贈雪簑

呼僕聊停白鹿車尋真偶到赤松家慢燒紅葉
朝炊飯旋汲清泉夜煮茶奔走烏蟾藏一粒伏
降龍虎採三花有時冲舉群仙會足躡星虹駕
彩霞

元日立春二首

百年難遇歲朝春今日春當獻歲辰覆盞酒辭
藍尾舊堆盤錫喜蓼芽新三冬已過空回首六
十將臨嘆此身是後柳如新到客從前梅作解
交人

新春喜向履端來舊歲驚隨殘臘迴律應葭灰
飛玉管香浮椒酒捧金盃雪融積漸生芳草風
峭續紛惜落梅綠勝銀幡曾受賜

立春日賜綵
勝元日賜銀

幡
追思往事獨徘徊

贈崔平橋舉人

屢試南宮猶未遇無然命運有參差掀髯空掃
凌雲筆舉手難撐犯斗槎是後青燈勤學業竚
看烏帽插宮花傳呼漢殿年方壯莫待名成兩
鬢華

瑩次口占謝高拓亭楊東里東江東漁東
菑五親知李南麓馬峯亭廉隅菴三門客
自葬吾親返市城忽驚時序屬朱明綠原舉目
春葩歇青塚傷心宿草生多日不沾山雨潤炎
風輕送野雲橫遠居離祖真吾罪百拜重臨感

客情

城下園林秋夜讌飲回文

芳園晚露帶林橫
亂影松堦印月明
狂飲酒深更漏轉
苦吟詩久夜寒生
墻園曲檻花連井
席展幽陰樹護城
香桂折來秋興發
堂槐種自得高名

秋夜別會稽馬舉人蒙次韻三首

羨君年少最風流
佐酒安能得莫愁
籍坐寒生將半夜
計時不久是中秋
鄉家遠在三千里
澤

國同登十二樓玄髮童扶華髮主青雲客情白
雲留

歸興遙從江水流況聞寒杵搗鄉愁華燈共愛
千金夜桐井忽驚一葉秋客去仍懸堂上榻悶
來莫倚水邊樓談詩對局觀書盡肯為東君暫
一留

天上驚看大火流入間節換自生愁鳴蜩嘒嘒
纔經夏過雁哀哀已報秋飲客恨無千日酒思
君遙望五雲樓再教欸會連三夜車馬門前任

去紹

附馬舉人原作

錦川桑柘映雙流
客邸蕭條感四愁
坐雨幾宵今是月
別君一日已成秋
山深倦鳥猶依樹
風靜殘螢自上樓
托跡文園聊自遣
莫因鄉國嘆羈留

憲副李三溪自武邑惠詩卷名為秋日水
西招隱次韻荅謝四首

霜降寒潭澈底清
幽居况復背高城
綰符當日

曾爲文把釣年來寄此生厭見甲光搖白晝喜
聞鍾額報新晴一秋行樂無終極何用金閨掛
姓名

龍藏大壑水偏清隱逸居連北斗城同志往來
俱上客異人傳授得長生不愁鍾鼓催朝暮自
有著龜卜雨晴手擲金章躬耒耜與時消息豈
沽名

不有纖塵混太清門前舉目見江城每携客賞
花備艷可共入閒草自生三唱隣雞秋日曉雙

歸洞鶴晚天晴夜眠早起為農圃因效樊遲得
令名

寥廓霜空分外清明生大小照層城大明生東

丹成能使朱顏返年若何愁白髮生世事奔忙

無定止天時候忽有陰晴急流勇退真難事若

水當時浪得名錢若水堂其能急流勇退者詳見述劉長沙小序中

三溪詩原二十首今止和其四而錄其二

瑟瑟秋風入座清白蓬黃籜滿荒城雁聲遠自

寒空度雲影忽從碧沼生曳杖穿花朝露濕披

襟散映午牕晴高風千載屬箕穎何用區區世上名

秋日用三溪韻送張玄同推府臨洮

行同冰鏡有餘清遠道携家赴塞城出授一官
秦四府由來十載魯諸生甲兵萬里防秋早砧
杵千家競晚晴佐政理刑真重任豫知遠邇即
知名

玄同之任關中愴然有感於舊遊用前韻

集唐詩二首

曉風殘月入華清杜鴈帶斜陽出渭城常去轍

已平秋草遍許行人過盡暮烟生司空蟬鳴驛

樹殘陽遠朱慶花
落閒堦夕雨晴劉惆悵舊堂

尙綠野李荒原空有漢宮名司空

露洗松陰滿院清李山牧童誰識帝王城李塞

花獨自愁中見柳好竹皆當要處生陸龜秦女

峰頭雲欲盡仙人掌上雨初晴崔休將世路悲

塵事張肯信吾兼吏隱名杜

與客遊古寺再用前韻集唐詩

爽氣朝來萬里清起錢知君回首望高城李南朝

古寺幾僧在劉沙際河流一夜生劉客舍喜逢

連日雨司空圖松陰自轉此山晴吳融悠然到此忘

情處溫庭筠不向山僧道姓名杜牧

山中訪隱士不遇集唐

長擬求閒未得閒司空圖尋君不遇又空還韋應

泉聲雜雨鳴幽澗盧綸嵐氣和雲補斷山權德輿新

結草茅招隱逸盧綸暮年詩賦動江關杜甫浮生已

悟莊周夢張泌須著人間比夢間韓愈

題趙節婦保孤卷次谷少岱挽張徐甥舅
詩韻有序

節婦趙氏原嫁密雲指揮使張春春與
僚友不協調衛蘇州同母舅徐通携男
女二十人有餘赴任舟中遇盜人貲盡
被刼殺存者止節婦及一子一女張氏
之鬼賴子永祀備歷艱苦乃質誥命畫
像及鬻丹書以為殯費竟由蘇州還其

鄉

遠自吳門返薊門新啼痕壓舊啼痕一絲有幸
懸三命斗酒無從與二魂札過徐君悲主歿嬰
憐趙朔保孤存簪纓金紫承先世華胄綿延子
與孫

附少岱原詩

子胥潮水落閭門甥舅傷心墮淚痕掛劍無賣
安拭眼挽詩有跡可招魂丹青妙畫曾安
白仙書鬻莫存歲歲江頭芳草綠杜鵑聲
王孫

贈浙江督學憲副馮少洲

書窮六籍及三墳勤學經年志不分上第三齊

連步武

父子五鄉進士

外臺兩浙丕揚文兼收方

盡江南俊慢道能空冀北群法眼嚴師如子少

定將學政繼前聞

劉五清萬五溪汪白泉皆前提學有名者

寄南禮部正卿致政葛與川

發解年纔二十餘髮猶未白綰金魚心懸北

闕常瞻斗身離南都早稅車院靜喜看舞有鶴

俸餘不患食無魚歸因懶病今非懶日讀床頭

未讀書

賞晚菊用袁西溪十月始見菊韻

宴賞終朝猶未已
同遊秉燭夜何其
霜前著蕊
雖云早秋後
總花莫謂遲
採藥狂生留少許
持盃為爾立多時
榮衰自是尋常事
且放高歌不用悲

附西溪原詩

恹爾清姿消瘦盡
冷風踈雨亦淒其
玄冬乍見
真成晚白首相期
亦未逢雲暗郡城
愁獨坐日

斜鄉國望移時罇前摘索原因醉燭底歌吟轉
更悲

邀客賞菊興猶未闌即有欲填枕明目者
手采黃花將盡以詩止之不及祇存綠
葉依依籬落間耳用松菊喬長史題醉

楊妃菊詩韻

早起花枝猶帶霜徘徊孤悶至斜陽開罇即日
邀同志倚檻因風嗅異香彩萼折來歸錦袖綠
衣何得間黃裳主人愛客情猶可惱斷園丁九

曲腸

附喬松菊原詩

嬾娜嬌姿不耐霜
芳根移得在朝陽
帶將春色三分艷
散作秋陰滿院香
傾日尚疑聞羯鼓
臨風猶似舞霓裳
祗愁野鹿偷銜去
寂寞梨園空斷腸

賞菊用李崆峒九日無菊詩韻

去年此日已嚴霜
籬畔黃花慘不香
今愛繁英臨砌好
漸慵文菊出簷長
性雖喜濕仍防水
菊

多則節木凌寒亦向陽紅藥黃蘭俱讓汝同時
出土不同芳

附堽峒原詩

季秋中立無霜逢閏今朝菊未香座上衣冠
皆玉立酒邊風日比春長閑河獨厯催淒色樓
閣疎林過夕陽便擬留君待花發龍山高醉嚙
寒芳

自城還鄉月夜緩步獨酌

野性山情不可移暫居城市亦非宜門閑為去

人煙遠燭滅憑將漁火吹月出竒峯看不足雨
餘芳草步行遲十年悔著詩千首百事無如酒
一卮

樂閒

仕路征車早已休如天大事不關愁閒門晝永
無車馬破牖更深見斗牛六十一齡隨日積百
千萬祿等雲浮心安自是身無病藥室雖傾不
用脩

養訥

早謝京卿返故園不將形跡混塵煩竊同鑒婦
常憂國雖是齊人羞乞墻省事其間還有事當
言之處亦無言山人非不能雄辯守允其堪養
性源

集古詩挽李脉泉

一夜霜風凋玉芝

劉禹錫

百年世事不勝悲

杜書

齋已換當時主

顏

藥園空餘舊

日

詩

秦沙上青

禽飛北隴

方林

間

烏鵲繞南枝

戴叔倫

故交已盡

新知少

許

歆語潛然便淚垂

取

隱逸

鳥獸誰云不可群沙鷗野鹿共溪雲鏡添白髮
餘千丈杖掛青錢僅百文有興閒遊如少壯無
能只可老耕耘客從京國來相顧不用殷勤訪
異聞

歸農一韻十四首

為郎曾屬大司農解職歸農興更濃家遠漫馳
千里駕陸辭暫聽五更鐘荒田着力連山墾野
碓由來借水舂學稼樊遲非不美吾今端可步

遺蹤

十載居官廿載農閒情莫似宦情濃歸來不醉
新豐酒驚覺多因野寺鐘歲稔欣欣無野哭日
高處處是村春同遊舊友如相見樸陋全然失
故蹤

當年何事不歸農奔走迷途恨頗濃苦口曾陳
闕闕疏甘心懶聽景陽鐘鋤禾雨後如雲盛脫
粟風前帶月春自伴田夫忘世味追尋往事杳
無蹤

布穀聲聲似勸農揮鋤難戀綠陰濃民安盡賣
床頭劍僧富無勞飯後鐘村塢晚霞蒙未照洲
隅斜日是高春一從引病還鄉後田父隣翁可
並蹤

如注甘霖足慰農青苗綠樹望中濃飽酒早膳
兼中膳卧聽晨鐘與晚鐘匹婦無能惟甌飯達
人有智運機春作為耒耜神農氏可是超群更
絕蹤

棄遺名利混耕農宦態如雲淡又濃可恨青蠅

汚白壁莫珎瓦釜棄黃鐘頻斟綠酒通宵飲亟

取香粳趁曉春飽後醉餘無箇事三皇自謂可

追蹤

陶淵明自謂羲皇以上人
揚雄謂可躡三皇之高蹤

從來百物出三農將旱欣逢雨意濃枕畔蕭蕭

聞竊竹樓頭隱隱度疎鐘良辰宴動驚鴻舞豐

歲知無止馬春

見漢書

斗粟百錢猶未售貞觀之

治繼遐蹤

除却三時方息農閒看山影夕陽濃采薇讓國

輕千駟簞食安貧勝萬鍾寒未授衣勤夜織饑

方謀食急朝春屢遭荒歎今豐稔浪說神人降
異蹤

誰云穀賤却傷農廩實倉餘睡自濃醉中罇中
千日酒夢驚花外一聲鐘殘機巧婦猶能織斗
粟貧民尚可春此際豐亨長聚會流亡不復寄
萍蹤

一辭朝市去明農始識林泉味最濃寡和調高
孤綠綺憐聞待問扣洪鐘大官膳美人難得小
碓粳麤僕亦春自媿知音兼好學惟能勇退是

孤臥

老漁老圃更兼農
菜羹花香綠樹濃
泊岸橫舟權罷釣
隔山知寺為聞鐘
雨簑掛戶因晴曬
雲碓當途盡日舂
華秋崇階吾不慕
一丘一壑足潛蹤

兩字田夫一字農
晚歸荷笠露華濃
胡山月照三秋杵
蕭寺風傳半夜鐘
無吏擊門催夏稅
有隣呼伴候晨舂
當年宦轍如蓬轉
畎畝于今有定蹤

上農莫道作中農，糞力多勤生意濃。
祭社彈絲蒸品竹，迎神考鼓更鳴鐘。
貿絲布密占能織，造飯航精為久春。
農隙從今堪眺望，名山處處有行蹤。

久無甲馬事春農，水色山光到眼濃。
輟食急隨迎社鼓，看衣不待落晨鐘。
山堂延客雲同入，石竇無人水自春。
迷失桃源當日路，却從何處覓仙蹤。

女有美而嫁村夫者，豈前韻為詩惜之耶。

鄆才人嫁為厮養卒婦古今事其有偶
同者哉

麗姬下嫁老村農淡掃蛾眉綰髮濃長嘆幽蘭
生糞壤堪憐廢鼓伴金鐘房櫳那得安身處井
臼親操弱臂舂願逐陽臺神女去朝雲暮雨杳
無蹤

推美婦之意代為答詩

勿論經商與力農禮成夫婦自情濃莫輕去手
同秋扇每話同心及曉鐘為了三縑常少睡能

精五飯在多春齊眉舉案何人者今古雖殊願
比蹤

勸農仍前韻

四體能勤豈惰農山田淡薄水田濃一畝可但
十分利寸木能鳴千石鐘蝸舍不脩仍舊貫魚
羹最羹出新春林泉有分堪棲跡城市無緣久
滅蹤

院醫廬陵胡螺川善太素脉携谷少成薦
書過訪索詩因次吾泉劉太守韻應之

家童放鶴忽飛揚
返棹嘉賓已在堂
手乏中黃非愛利
脉明太素乃餘長
濟南近有音書至
江右遙聞名姓香
試問螺川風景異
欣然一笑解詩囊

附吾泉原詩

山人蕭散貌清揚
舊隱螺川近草堂
野性每耽丹壑僻
閒情更逐白雲長
出山尚帶烟霞色
斲藥兼和草木香
蚤已知君抱玄術
怪來肘後繫青囊

遊白雲湖夜歸

遊湖爽約數年間今日携家始遂閒漫道望洋
錯認水辭疑斷岸即為山繁絃急管中流發短
棹輕帆半夜還不是病餘親藥餌通宵乘月弄
潺湲

九月三十日至祖村為十月朔日祭先隴
四壁鵲噪晚禾收瑟瑟楓林最惹愁四塞陰雲
容易暮一交明日不為秋漫誇聞望如山重堪
嘆韶華似水流恃壯即看冬祭畢南村煙霽可

豪遊

聞北虜警報

驚聞虜騎近都城東國飛徵大道兵龜免有靈
呈異瑞犬羊何事敢橫行南牕雖是攻儒業北
闕長馳報主情願效終軍兼定遠會須投筆
請長纓

曉起聞倭夷警報

嗟予國士媿無雙早謝京卿返舊邦百尺樓高
山伏枕三竿日出影穿牕靜觀世態堪為恨聞

警憂心不可降無數甲兵來日本何時波浪息
風江

尊賢祠有序

錫山有尊賢祠祀唐宋及我朝十名
賢父矣創建於文莊邵二泉重脩於通
叅秦從川嗣後添祀二泉及中憲脩敬
公摠之則十二賢矣雖流寓顯晦不同
然皆有事於茲土者也脩敬乃虹洲秦
學憲之高祖而從川則虹洲之父也義

舉不可無傳特以是詩鳴其盛云

錫山舊有十賢祠增置遺賢亦不私踪跡升沉
均聞望羨牆彷彿見容儀傳言頗悉當時事實
德能留後日思香火豈惟動梓里行人瞻拜薦
江籬

與嵩陽劉太守簡劄往復未嘗及罷官事
因和其詩偶爾及此

五馬翩翩之郡時他年公輔衆皆期鳳梧難得
賡周詠魚藻翻成賦楚詞宦態如雲蒼狗變閒

心似水白鷗知台臣憎直君同我往事微茫付
夢思

再用前韻有述

能文難遇重文時自幸生來恰應期不向南山
耳豹隱願遊北闕吐雄詞微生濫與春官選苦
死不為夏相知綠鬢一麾今白首五雲多處倍
相思

附嵩陽原詩

花鳥欣欣異往時春風又是一年期孤雲閑倚

玄湖棹千里遙傳白雪詞汝上耕夫空自老海
東釣客有誰知一緘聊付青鸞翼直到胡山慰
所思

赴親友婚席冒雪山行感述

谿轉山廻路不平那堪病體雪中行
虛將歲月酬人事曾歷風霜冷宦情
食不嚙乾衰齒動醉常彈鋏壯心
驚擣材雖大終何用每歆述名得
令名

秋夜宿水村夢覺已曙因而有作用魏太

府見寄詩韻三首

蛩鳴鴈度自生愁
人世飄飄似水浮
變態片時雙白眼
隨身十載一蒼頭
醒來月落瑤池曉
靜聽風搖玉樹秋
最是東君能好客
幾迴欲去復相留

一日愁添一日愁
半生名利總虛浮
卜居田舍青山口
借宿漁家古渡頭
黃菊紫萸逢九日
白蘋紅蓼正三秋
官忙豈若閒遊好
怪得京師不肯留

霜清景肅不勝愁敗葉隨風水面浮遙憶美人
千里外驚聞渡客五更頭寺鐘不待鷄分曙隣
杵兼同鴈報秋為愛村居人事少懶歸城市久
淹留

附蘭川原詩

詞客風塵動四愁海天寥廓暮雲浮醉來萬事
無青眼老去孤吟有白頭龍劍精光寒曙斗驪
珠夜色照高秋栢梁宴罷聲名藉蕭瑟還堪桂
樹留

送鶴泉高光祿假滿旋京

曾參豹尾近 飛龍此去還將舊職供養母過
家烹五鼎忠 君報國必重封惟予交契因同
調與爾升沉本異蹤有問山人仍健否病餘無
復舊形容

瑞室有序 四明薛氏乃世宦世德家也
當宋之紹熙淳熙間隣里兩被火災而
薛室獨免宣獻樓公題曰瑞室歷代悉
有詩頌裔孫有名晨號霞川者孝友文

雅向予索瑞室詩乃步李滄溟韻亦為
一律云

百年生聚化寒灰兩度君家火不來隣舍一空
心獨苦牆隅四望首重囬靈光長在真為瑞北
閣延燒亦可哀上客爛焦吾不賞惟勤醮事禳
奇災

謝武川社太守惠新脩青州志書

志青文筆有誰能東國爭傳紙價增三輔黃圖
難擅美兩京雜記可同稱山川百里無遺覽文

獻千年有足徵善政宜民書不盡清嚴操守況
如冰

統孫夾谷一韻三首

人海曾來有是非思君一度一沾衣十年拘繫
今方脫一疾危亡竟不歸驚訝芻蕘為獄吏悞
疑隧道是園扉龍泉偶自豐城出幻化還從天
上飛

行年五十已知非六十猶然慕錦衣三次上書
皆不報一肩行李復空歸華堂客散塵凝榻書

屋人亡畫掩扉不是厚誣終得釋幽燕六月又
霜飛

物是堪憐人已非凡筵猶設舊朝衣只今夜
騎鯨去何日雲霄化鶴歸名姓依然存粉署文
章久矣動朱扉當時歌舞稱觴地惟有啾啾鳥
雀飛

挽念菴羅狀元一韻二首

入耳驚人隣笛哀傷心學士碧山摧空憐警句
存詩卷無復高談對酒盃鬱鬱佳城從此閉滔

滄逝水幾時迴雖云掛劍賢人遠定有求書使
者來

塞遠雲長旅鴈哀鑑亡蘭茝更松摧雄文當日
魁多士荒塚何時奠一盃願舍百身難得贖射
潮萬弩不能迴谷坪師長荆川友泉下英魂自
往來

得浚谷趙中丞書感賦

相遠數載不相聞忽墮音書自隴雲池內潛蛟
將起蟄天邊飛鴈惜離群惱人心事將誰語愈

我頭風賴爾文憶昔趨朝天未曙鳴珂同拜

聖明君

季冬大雪已而因暖成雨俗謂之夾雨帶

雪二首

雲容變態歲華歸雪意氤氲日色微
蕩颺鵝毛隨雨落輕盈蝶翅闌風飛
呼朋共賞開家醞出使曾經點客衣
薪桂米珠吾不慮只愁占斷釣魚磯

歲殘抱病憂乾旱一雪身輕棄杖藜
沽酒新豐

增舊價賦詩舊館有新題微茫風絮千山失累
綴天花萬樹低六出暖融成暮雨探梅無興畏
衝泥

挽楊升菴有序

升菴書來過許予學能博且求觀董道
書跋及戴侗六書故已為之錄完將發
即有傳其絕筆詩至者其中有云樹杪
風輪轉池中泡影長全詩字字使人悲
哀而二句則尤警切原以罪編戍雖卒

戎所猶幸不為深禍忌其才者棄置竟
未得款廻尊翁石齋有保安社稷功一
時雖未盡知後世必有知之者以俟天
定而已

萬里傳來絕筆詩讀之一字一傷悲曾稱博學
無如我代錄奇書寄與誰謫戎卒然赴虎口入
宮終是妬蛾眉先人功德廷臣上一世無知百
世知

除夕有感

少年不覺歲時遷老景偏于除夜憐前此宵分
為次日今番坐久是新年雪中偏覺梅花艷燈
下頻將竹葉傳不荷湔除多罪譴當朝侍從久

歸田

國制每於除日覃恩湔
除京職之有罪過者

丙寅元日

青陽左个開天上北陸迴光日漸遲為戀老梅
無官況不因新柳亂鄉思羊裘換却和風轉鳳
管還從寒谷吹冰泮閒人何所事繡江魚美好
垂絲

人日夜宴

一從去歲客星明更喜新春入日晴
初宴開樽傳福葉夜闌秉燭鎖柴荆
陰崖雪積寒猶峭陽谷春廻暖自生
久在林泉群野老席爭名利不須爭

穀日二首

池中綠水長新波門外青山雪霽多
春谷乍聞黃鳥弄午牕又見白駒過
連朝會社從齊俗此日當年赴漢科

巳丑新正八日壬子會試歲月如北行計今歲十八年矣

流雖老大少狂壯志未消磨

薄利休從身外求深耕且作眼前謀柳風搖曳

春偏好穀日晴明歲不憂十畝閑如雲自住百

年疾似水東流西園一所非無忌

書院在學西
邑人咸稱曰

西園又西園乃
公子無忌故事南國千年有莫愁

近得一
煩能歌談

酒佐

元夕邀客賞燈燕聽箏笛二樂

上元又是新年節狂客高歌醉不休摘酒生春

連百傳運燈照夜足千籌風前鐵笛驚三弄月

底銀箏試一搗聽徹落梅無出塞居人自是不
關愁

陳墓客在南村喪偶遂塋畢避風飲於田
家

墓客室亡遙送葬出門忽爾起風塵急趨塋墓
時將午再過田家又幾春滿座村夫無野老關
醵地主亦山人火燒城郭紛華甚欲構茅廬作
近隣

正月念又九日風中赴遠親招飲

新年即歡訪丹丘二月將臨始出遊
環重親情風不避應酬人事日無休
迴看朝士爭三舍看此山僧讓一籌
僧尚不如深自媿安閒况敢望沙鷗

賀南都大司馬同年胡栢泉

三百同年四十春惟君貴顯極人臣
廷推暫借司留鑰宸眷行看秉國鈞
浪靜四時虛備海風恬萬里不揚塵
少年已是無雙士南國今爲第一人

西野表翁壽登八表親友咸將往賀焉子
以小詩特為之倡云

生來喜即際熙辰坐嘯行歌物外人幼在黉庭
曾里正老臨學舍作鄉賓嘲風咏月三千曲傲
雪欺霜八十春足疾雖深旋得愈谷神養後轉
精神

新春憂邊警徹夜不寐旋聞兵馬聚盛虜
必敗遁不足憂矣

藜藿還為玉食謀家庭常繫廟堂憂天邊狼角

芒初長雲外龍標浸不收待月無眠仍待旦防
春豈但只防秋堪嗟蠟在車前奮正是魚從釜
底遊

十二月大雪天且甚寒

冬雪年年幾度飛雪遲今復值寒威江流凍合
魚龍蟄林木低垂鳥雀稀高卧袁安真隱逸暫
休蕭老得皈依吟詩白戰吾方苦酒客臨門忽
解圍

挽雲峯王士登一韻二首

水向東流竟不歸日方西墜歛餘暉口歌詞社
今初歇足跡閒門後漸稀忍見牆邊存卧席况
兼几上設遺衣重來燕子春方好那識堂前舊
主非

化鶴遼陽有日歸啼鴉樹杪競斜暉青年衆美
賢孫盛白髮予憐故友稀枯木何時生暖燭紙
錢相伴爇寒衣不須責備生前事自有鄉評定
是非

晚菊

居近菊潭曾得壽吾今種菊遶欄干晨興急問
經霜否夜坐還宜映月看盈把東籬陶令醉落
英南國屈平餐浴藕爾雅菊之總名亦自堅晚節松栢
偏稱保歲寒

移菊夜宴用荆川唐太史韻

雲開風定夜將霜天香移花上草堂細數方知
過百種深藏豈是避群芳傳觴著藥浮清味剪
燭折枝爆異香酒數終期如菊數醅醕賓主兩
相忘

附荆川原詩

曠野陰陰萬木霜誰携數盞到茆堂閒情最愛
能孤秀素質還宜冠衆芳在野寧辭荒草掩入
簾聊作滿庭香莫云花與曾來少對爾欣然自
兩忘

挽梅菴張州同三首

仲冬晦後亡袁友今月初旬又哭君祇望百年
交契久豈知一旦死生分淚同雪下無乾土魂
逐風飛有斷雲預造紅香迎臘酒明年此日奠

新墳

壽踰八十人生少一疾三朝亦可悲豈意知交
長往日正當衆烈盛寒時淒涼畫像臨香几斷
絕掀髯把酒卮好似繡江東逝水滔滔無有復
還期

投老清閒有夙緣一官未久即歸田輕財不減
豐亨日嗜酒猶如少壯年長夏為農東郭外明
春擬塋北山前將因作誌藏幽室先具薄儀薦
几筵

携妓遊山

自笑衰殘白髮侵東山携妓强登臨鳳頭釵
簪沉清溜鴈足箏排趂綠陰彈手輕攤兼歇拍歌
唇不動有餘音曲終奏雅方為得踞坐石床弄
古琴

海村劉亞卿見惠棺料乃金洞之產喜而
有作二首若褊隘者見之將豫憂之矣
疎懶辭官早上書東歸踪跡混樵漁
藏身有具來金洞回首無緣直玉廬
一寸桐棺均是塋三

年石槨待何如縱過蒼蒼升仙去一枕黃梁總是虛

豫置生材為後計百年限滿願無違堪嗟俗士

常多忌惟有達人不諱歸翠老瓦棺真得計翠

老僧生前自製瓦棺滕公石廓永相依漢滕公夏侯嬰墓

鳴不行因掘地得石廓朝聞夕死猶無悔上有滕公居此室之銘

咸稱倍古稀

聞中感舊

春秋結社嫌猶開朝暮遊山與太豪貴在一心

隨所適莫將四體恁徒勞記曾為士憎多口一
自辭官有二毛身外風塵驚滾滾眼前歲月任
滔滔

挽貞菴劉郎中一韻二首

人遊芳名百世留良朋從此息交遊堪嗟生死
成岐路莫道賢愚共一丘酒熟無非猶子奠書
多自是有人收世間難煉黃金鼎天上俄成白
玉樓

棺美傳聞堂上贈衣重總是友相周人雖載酒

非詢字客為遺書敬遠求簌簌兩行行道淚蕭
蕭四壁舉家愁封高三尺郎山下不讀碑文識
姓劉

賀亞卿霍思齋父母雙壽重封二首

二親雖長不龍鍾新荷天恩動喜容鶴髮童顏
清書永鳳書鸞誥紫泥封制辭代草原黃閣奇
術延年自赤松福壽日崇何所似太行山上最
高峰

晝無別慮夜安眠何用蓬瀛訪列仙新筍江魚

供早膳蒼松野鶴伴春筵千年千度雙親壽三
品三遷一子賢共喜恭承新寵渥龍章來自五
雲邊

送西谷李方伯上疏得請將致仕還其鄉
仕路方亨日未曛飄然歸興迥離群歷遷藩伯
為時久破例京卿竟不聞手筆猶題濟水月心
旌已逐太行雲林泉清福平分去豈獨吾稱李
隱君

傳聞將歸遂作此詩送之乃接知部覆
未准歆即除去友勸詩頗可堪存之

問西野疾

居嘗嘖嘖嘆衰殘病勢今增坐卧難數日再逢
驚貌改一朝不起亦心安微茫往事如春夢生
死達人作大觀厚德壽年寧止此請親藥餌更
加餐

六十五歲八月二十八日生辰自壽一韻

二首

嗜詩不減當時興恭手新來尤所長舉目無人
能對壘駐顏有客授奇方暮年節慎何憂病少
日艱辛已備嘗身佩紫萸能益壽由今十日是

重陽

放歌猶是少年狂身健何嫌鬢髮蒼星士每稱
多壽筭巫師不必示行藏黃花滿徑風霜少老
栢成林歲月長六十五齡交旺運好將藥裹改
詩囊

謝任醫士有序

予女貌甚美而瘰癧為害聞外科任綿
山能治之也使使持書逕於清泉郡至
則應手而愈然以熱醫遊焉命也於其

別詩以謝之亦禮也每欲靜養忘世情
至此則不免傷情之甚矣若得男庶可
解慰予年雖長尚當勉力也

任君攻外父知名遣使馳書遠奉迎氣瘳全消
仍美女骨蒸不已却傷生人言醫病難醫命自
謂忘情太動情愛女如男今已失得男方可慰
生平

哭幼女招弟

心如刃刺淚如傾霜重花嬌恨不平設脫舊居

秋草滿埋香新塚暮雲橫微茫猶記驚人色疑
訝如聞喚婢聲偶向綉房簷下過風吹牕紙助
哀鳴

為鄭姊丈喪事兩過釣魚臺南村村久荒
落鮮人煙時正初冬木葉已殘而徑花
猶艷經由樂盤袁長史墓下愴然動懷
詩末因及之

兩朝重過釣魚臺為重親情真送來野燒空中
飛暖焰廢村竈底只寒灰滿林紅葉隨風轉夾

路黃花向日開
撫景更悲哀
右史荒墳久臥白雲隈

送別駕葉流湖署縣事有成還省

署政章城延濟城
政成遠邇沸賢聲
均田高下衡無爽
審役羸肥鏡自明
循吏曾來多二守
窮民有幸慶三生
喬遷不日朝天去
遺澤明春滿地耕

丁卯元日

改元不改昔繁華
里巷絃歌遍海涯
孤竹春前

生嫩筍老梅暖後看叢花慶年盛設嘉賓席召
用無勞使若車朝士均沾新雨露野人惟戀舊
煙霞

賀沈湖陞雲南僉事

飛來驛使報遷喬豸服官尊色不驕曾用呂刑
驚老吏今持漢法伏山獐十年外補真為父萬
里南征莫憚遙指日定蒙宣室詔長趨鳳闕
聽簫韶

生日病中

初度年時賀客繁今年抱病臥文園胃傷忍餓
遲加飯體倦思眠早閉門夢覺無端愁脉脉神
搖有似聒昏昏選方和藥沉病起多賴屏巖與
小村

戊辰元日

六十餘齡兩戊辰今辰猶是未衰人青藜杖屨
長行健綠柳條新遠望真早起書雲聊卜歲不
須曝日已知春林居朝闕同鄉老尚憶當年
拜紫宸

應酬人事屢過右川康太守墓下感而賦

此

東臨古道康君墓人事經過亦太頻遙望豐碑
常洒淚每持遺翰一傷神重歸海外二千歲止
駐人間四十春方悟白頭何處是
頭人